


गुँला धर्म ?



रत्नकाजी बज्राचार्य

गुँला धर्म ?

उच्चमि:-

रत्नकाजी बज्राचार्य
मन्त्रसिद्धि महाबिहार
सवल बहा यें

पिकाक:-

श्रीमति सानु नकःमि व छेंजःपिं
महाराजगंज चक्रपथ यें

स्व. लक्ष्मी नारायणजुया नामं धर्मदान यानागु जुल ।

बुद्ध सम्बत २५४३

नेपाल सम्बत १११९

विक्रम सम्बत २०५५

ईस्वी सम्बत १९९९

ब्याक्व अधिकार च्वमियाके

धर्मदान याःपिं :- श्रीमति सानु नकःमि, सूर्य नारायण नकःमि
राजु नकःमि, सानुराजा नकःमि
शुशिल नकःमि, व शुरेस नकःमि

पिदंगु न्हि :- ल्हुति पुन्ही

न्हायापांगु १००० गू ।

सफू दइगु थाय् - रत्नकाजी बज्जाचार्य
चव्यूबू धिमेल्बहँ येँ
फोनः २७६७७३

श्रीमति सानु नकःमि
महाराजगंज चक्रमथ, येँ
फोन नं.: ३७३१९९

कम्प्यूटर:- रमेश भट्टराई/टंक घिमिरे

थाकू:- देउराली अफसेट प्रेस ।



स्व:- श्री लक्ष्मी नारायण नकःमि

जन्म: वि.सं. १९८४ कार्तिक कृष्ण औंसी (लक्ष्मीपूजा)
स्वर्गीय: वि.सं. २०५५ फाल्गुण शुक्ल अष्टमी (चीरस्वाये)

छलः-पौ

	<u>पौल्या</u>
१. जिगु छत्वाचा	क-ख
२. प्रकाशकीय	ग
३. यैया गुँला धर्म	१-१४
४. यलदे (ललितपुर)	१५-३८
५. खवपदे (भक्तपुर)	३९-४०
६. थिमिदे (मध्यदेश)	४१
७. चाःबही (चारूमति महाबिहार)	४२
८. सक्वदे (साँखु)	४३
९. गुँला बाजं	४५-४६
१०. सन्दर्भ ग्रन्थ	४७

जिगु छत्वाःचा

भीगु नेपाल मण्डलय् स्वनिगःया दुने थी थी कथंया संस्कार संस्कृतिं छायापातःगु दु । भी मनुतय्त मदयेकं मगाःगु नसा त्वंसा आदि दच्छिया दुने ऋतुया आधारकथं नयेगु त्वनेगु यानावयाच्चंगुयात हे भीसं भीगु संस्कृति धका धायेगु यानावयाच्चंगु दु । व खः सकिमना पुन्ही अर्थात् कार्तिक शुक्ल पुन्ही परेवाकुन्हु उगु ऋतुस दयाच्चंगु सिसाबुसा फुक्कं तयाः थःगु गच्छे अनुसारं पुजा यानावयाच्चन । थथे हे मंसीर शुक्ल पुन्हीबलय् यःमही दयेका दान याना, यःमही नयाः नखः हनावयाच्चन । गुंपुन्हीबलय् गुता बीबःया क्वाति त्वनाः छुचुंमही नयाःनखः हनावयाच्चन । थुकथं थन बौद्ध, हिन्दु निखलःसिनं भेदभाव मतसे हनावयाच्चंगु भीगु संस्कृतियात, नेवाःसमुदायया थःगु हे बिस्कं पहःयात भीसं च्वमछासैं मगाः ।

थुकथं भीगु संस्कृतिया दुने सत्वप्राणि उद्धार यायेयानिन्ति संस्कृतिया साथसाथय् धर्मया आचरणयात नं प्रति पालन यायेत भिंगु सत्कर्म नं याकाः पुण्य संभार यायेगु लंपुइ मन क्वःस्वकातःगु भीसं वाःचायेका वयाच्चनागु दु । गथेकि - सकिमना पुन्हीकुन्हु भी बौद्ध जनपिसं आचरण सुद्र जुइगु स्तोत्र (तुतः) च्वनाःधर्मया आचरण यायेत क्वाःपाःद्यःया न्ह्यःने च्वनाः छुस्या मुस्या हि सकी आदिया कलश, खड्ग आदि थी थी चित्र च्वयावयाच्चंगु भीसं खनावयाच्चंगु दु । हानं अपाकू वनेगु धकाः भाद्र शुक्ल द्वादशीकुन्हु सीम्हेसिया नामं दिवंगत जूमह जुयावंमह प्रति सत्गृतिया कामना यासैं उपाकूवना सत्कर्म यानावयाच्चंगु दु । अथेहे बैशाख शुक्ल तृतीया (अक्षयतृतीया) कुन्हु साखःति त्वंकाः लँजुवाःपिनिगु ताःन्वंगु प्याःचा लंकेया आज्जुकथं साखःति दान यायेगु कथं नखः हनावयाच्चंगु नं दु । थुकथं भीगु नखःचखः आदि संस्कृतिया दुने धर्मया आचरणया नापनापं सत्व प्राणिया उद्धार यायेगु मनसाय नं ज्वना न्ह्यानावयाच्चंगु दु सा थःगु जीवनयात सुखमयया नापं मानव धर्मया आचरण बोध यानाःपुण्य संचय यायेया लागि थी थी कथंया संस्कृति हनावयालि थौ तर्कन ल्यनाच्चंगु नखःचखः आपालं खनावयाच्चनागु दु ।

थुकथं हे गुँला धर्म नं वर्षाऋतुइ लानाच्चंगुलिं थूगु लाया दुने आपालं वर्षा जुया भूमि चलःवनीगु भूक्षय जुइगु, खुसी बाःवइगु अतिवृद्धि जुइगु जूगुलिं बौद्ध

नेवाःतयसं थूगु दुःखं मुक्ता जुयेत सत्वप्राणिपिनिगु हितया निमित्तय् श्रावण शुक्ल परेवानिसें भाद्रशुक्ल परेवा तक्क लच्छियंकं स्वयम्भू महाचैत्यया दर्शन याना वन्दना, कामना, पुजना याना गुँला बाजं थानाः प्रदक्षिणा याना बहा, बही, चैत्य, बुद्धमूर्ति अवलोकितेश्वर देवदेवीपिनिगु देगःचाःहुला नसंचा क्वचायेकी । छगू कथं थौकन्हय्या परिभाषाकथं गुँला लच्छि स्त्रयम्भू महाचैत्ययात प्रक्रिया यायेत बाजं थाना स्तोत्र तुतःब्बना सुथ न्हापां नसंञ्ज उलेगु भीगु संस्कृतिरूपा रूप्य नालावयाच्चने धुकल सा मेकथ ताःन्वःगु इलय् घौछि सुथ न्हापां दना Morning Walk वनेगु थें सुथ न्हापां यायेमाःगु कर्म थें भाःपिया वयाच्चंगु दु । थुजाःगु कथंया भावना नं थःगु मन शरीर सुद्ध, सत्कर्म यायेगु हे खः । सत्कर्म यायेगु हे धर्म खः थुकथं गुँला धर्मया लच्छिया दुने ल्याय्म्ह व न्यासे, बुढा बुही भाजुमयजुपिं सकलसिं गुँलाया महिमा थुइकेगु, सिइकेगुया निमित्तय् जिम्ह यजमान मयजु सानु नकःमिं थःम्ह स्वामि दिवंगत लक्ष्मी नारायण नकःमिया नामं धर्मदान यायेगु धर्मचित्र उत्पत्ति याना द्यूम्ह वय्कः व अनया सकल छँजःपिन्त जिगु दुनुगलनिसें सदां थें धर्म यायेगुलिइ श्रद्धाया अंकूर जायाच्चनेमाः । हानं थुगु धर्मदानद्वारा दिवंगत लक्ष्मी नारायण नकःमिया दुर्गतिमेचन जुया निर्वाण साक्षात्कार जुयेफयेमाःधइगु कामना यानागु जुल ।

थूगु सफू पिथनेत थिमिदेया नादंम्ह, हनेबहःम्ह भाजु मञ्जु वज्राचार्यजुं थिमिदेशस यानावयाच्चंगु गुँला धर्मया बारय् छसीकथं कना बिज्याःम्ह वय्कःयात जिगु दुनुगलनिसें सुभाय् बियाच्चना । थथे तुं सक्वदेया भाजु अमृत बज्र वज्राचार्य व चाबहीया स्थबीर भाजु गणेश बहादुर शाक्यजुपिसं नं थःथःगुकथं हनावयाच्चंगु गुँला धर्मया खँ कनाः ग्वाहालि याना बिज्याःपिन्त दुनुगलनिसें सुभाय् बियाच्चना ।

थूगु सफू पिथनेत देवःकिपा च्वया ग्वाहाली याःम्ह काय्भाजु गौतमरत्न वज्राचार्य व पुफ स्वयाः शुद्धिकरण याना ग्वाहालि याःम्ह काय्भाजु ज्ञानेन्द्ररत्न वज्राचार्यजुपिन्त जिगु आपालं आपालं शुभ आशिर्वाद बियाच्चना ।

हाकनं प्रेसया दुजः रमेशमान नापितजु नं न्हिन्हि पुफ छँ थ्यंक बी हयाः, यंकाःयक्व यक्व ग्वाहालि याःम्हयात नं आपालं सुभाय् बिचाच्चना ।

ध्व सफूया लागि कम्प्युटर ताइप याना याकनं याकनं सिधयेका ब्यूम्ह भाजु रमेश भट्टराई व टंक घिमिरेयात व देउराली अफसेट प्रेस परिवार सकसित यक्व यक्व सुभाय् बियाच्चना । अस्तु ॥

प्रकाशकीय पाखें

जिम्ह स्वामि स्वर्गीय लक्ष्मी नारायण नकःमिजुया बौ स्व. भिम नारायण नकःमि व मां देव कुमारी नकःमिया गर्भं जन्म जूम्ह निम्ह काय् मध्ये न्हापांम्ह काय् स्वर्गीय लक्ष्मीनारायण नकःमि जिम्ह स्वामि खः । गुम्ह स्नेहमयी मां देवकुमारीया स्नेहमयी ममताया मुल्य हुर्क्य जुयाः ब्यवहारिक, सामाजिक कुल परम्पराया थी थी वाफ्य पंगःया सामना यायां ध्व अनित्य संसार यात ७१ (न्हय्छदै)या उमेर्य् छैन भंङ्गरु देह (शरीर)यात त्वःता कला, काय् म्हायाय् मचा खाचा सकसित् छवयेका २०५४ साल फाल्गुण शुक्लया अष्टमिया २२ गतेकुन्हु थूगु संसारं त्वःता भाल । अथेसां थःगु जीवन काल्य् बय्कः छम्ह मिलन सारम्ह-ब नेपाःया थःगु संस्कृति धालकि हुरूक्क जुइम्ह, समाजया लागि थःपिसं फूगु चाःगु ग्वाहालि यायेगुलिइ तसकं मन वनीम्ह, न्ह्याम्हेसिनं चन्दा धाःवःसां नं थःगु यथाश्रद्धाकथं चन्दा बिया सहयोग यानावयाच्चना दीम्ह खः । मचाखाचापिनिगु प्रति नं माया ममता तयाःमाःकथं शिक्षा दिक्षा बियाःकूलपरम्परायात स्थीर याना दुःखया सामना यायां सुखया जः खयेके मगाक्कं हे जिपिं छेजःपिनिगु स्नेह, माया, ममता सकतांयात त्वःता, संसारयात हे त्याग याना भाल । ध्व हे भोल्य् जिमि हनेबहःम्ह गुरू रत्नकाजी बज्राचार्यजु याके अनुरोध यानाकथं वस्पोल स्वः लक्ष्मी नारायणजुया नामं सफू छगू पिकया धर्मदान यायेगु, आज्ञा जुसेलि गुरूया वचनयात शिरोधार्य याना वस्पोलं च्वयाबिज्याःगु “गुंला धर्म”? धयागु थुगु सफू पिथनागु जुल । थुगु पुण्यद्वारा जिम्ह मदुम्ह जहानया दुर्गति मोचन जुयाः सुखावति भूवनय् बास लायेमाःधयागु जिमि सकल छेजःपिसं कामना यानाच्चना ॥ कामना यानापिं जिमि छेजःपिनिगु नां धलःक्वय् न्ह्यब्वयाच्चना ।

दिवंगत लक्ष्मीनारायण जुयाः-

- किजा :- बट्टी नारायाण (खेर) नकःमि
जहानः- सानु नकःमि
काय्पिं:- सूर्य नारायण नकःमि, राजु नकःमि, सानुराजा नकःमि, शुरेस नकःमि ।
न्ह्याय्पिं:- मिरा, बिमला, इन्दिरा ।
तताकेहेंपिं:- नानीदेवी, हरिदेवी ।
भौपिं:- शान्ति, सरश्वति, रिता, कल्पना, ।
छय्पिं:- सुरेन्द्र, समिर, सुलभ, शिरिस, नीरा, जरिना, प्रीति, सुइति, श्रीया ।

सानु नकःमि

चक्रपथ महाराजगंज येँ ।

गुँला धर्म

गुँला धर्म धइगु गुँलाध्व पारूकुन्हुनिसें यँलाध्व पारूतकया दुने लच्छियंकं भीसं हनावयाच्चनागु ला खः । ध्व लच्छिया दुने स्वनिगःया भी बौद्ध धर्माबलम्बिपिं, महायानी धर्माबलम्बिपिं सकलें स्वयम्भू महाचैत्यया दर्शन पूजन याःवनी । दर्शन याःवनीबलय् गुँला बाजं थाना (थःथःगु संस्कृतिया बाजं थाना) तुतः नामसंगीति ब्वनाः बहा बही पतिकं च्वपिं बुद्ध बोधिसत्वपिन्त नं पूजा याना वनेगु परम्परा दयाच्वंगु दु । हानं सुथय् वा बहनी ध्व लच्छियंकं बिहार बिहारय् थःथःम्ह क्वापाः चःया न्ह्यःने च्वना तुतः नामसंगीति ब्वनेगु परम्परां नं थाय् कयावयाच्वंगु दु ।

आः थन गुँला धर्म छाये धाल धइगु छकुचा छँ न्ह्यब्वये :

ध्व गुँला धर्मय् महायानया फ़िगू मूल आधार जुयाच्वंगु नववैपुल्यसूत्र नव्याकर्णयात विशेष महत्व बियावयाच्वंगु दु । ध्व लच्छिया दुने बिहार बिहार छँखा छँखा पत्तिकं थुगु सूत्र पाःथ्यायेगु चलन भी महायानी बौद्धपिनिगु खः । नव्याकर्ण धायेबलय् १) प्रज्ञापारमिता २) गण्डव्यूह ३) दशभूमिश्वर ४) समाधिराज ५) लंकाबतार ६) सद्धर्मपुण्डरीक ७) सुवर्णप्रभात ८) ललितविस्तर ९) तथागत गुह्य (गुह्यसमाज तन्त्र) खः ।

थुगु गुंगू नव्याकर्ण बिहार बिहारय् जक पाःथ्याइगु मज्जूसे जजमानपिन्थाय् छँय् नं नवसूत्र पाःथ्याइगु चलन दयावयाच्वंगु खः । थौकन्हय् वयाः भी बज्जाचार्य गुरूपिनिगु अभावं याना पाःथ्याःवनेगु चलन मदया वने धुंकल धाःसां ज्यू । अथे ला गुरूजुपिसं धाइ, जजमानपिन्थाय् पाःथ्याःवनेगु परिश्रमया मू स्वाःने गयागु ति हे मसाः दक्षिणा बीगु । आन्तिसें पाःथ्याःवने म्हा धकाः वनीमखु । गुम्हं गुम्हं जजमानपिसं थथे नं थाना हलकि दच्छिया छक्वः जक जूसां गुबलय् फुर्सद दत अबलय् १० म्ह/२० म्ह गुरूजुपिं ग्वःम्ह सःतेफु वःम्ह गुरूजुपिन्त सःताः न्हिच्छि बिइक त्रिकाल थाना नव्याकर्ण पाःथ्याकी ।

थुकथं गुँलाध्व लाया(लच्छिया) दुने गुंगू ग्रन्थ पाःथ्यायेगु अध्ययन यायेगु परम्परायात हे गुँला धर्म धाःगु खः । गुंगू ग्रन्थ पाःथ्यायेगु ला जुयानिन्ति हे थूगु

लायात गुँलाध्व धा:गु ख: ।

मेगु अर्थय् ध्व गोश्रृगपर्वतयात सिंगु धयागु चलन सकसिनं स्यूगु हे खँ ख: । थुकीया कारण हे गुँया अर्थ कथं हे लच्छियंकं हनीगु पर्वकथं गुँला धायेगु नं या:गु ख: ।

हानं मेगु कथं धायेगु ख:सा महामञ्जुश्री गुरूं नेपा: दे दयेकेत ल: फुक्क पिने छ्वया: बिज्यात । दे निर्माण याना बिज्यात । अनंलि गोश्रृङ्गपर्वतय् लिधनाच्वंगु स्वयम्भू महाचैत्यया ज्योतिरूपयात गौड देशया प्रचण्ड देव जुजुं गोश्रृङ्गपर्वतस बिज्याना गुणाकर धयाम्ह गुरूयाके उपसम्पदा ग्रहण याना शान्त श्री भिक्षु जुया बिज्यात । अनंलि ज्योतिरूप स्वयम्भूयात चैत्याकारय् परिणत यायेत गुणाकर गुरूयाके हाकनं बज्राचार्याभिषेक कया शान्तिकराचार्य जुया बिज्यात । गुणाकर गुरूयाके आज्ञा कया ज्योतिरूप धर्मधातु स्वयम्भू महाचैत्ययात चैत्याकारय् परिणत यात । उगु बखतया चैत्यया स्वरूप जिं स्वयेबलय् धान्यरासीकृति चैत्यकथं गथे कि थूरया लसिकथं स्थापित या:गु जुइमा: । गुकी द्य: मतसे ख:प्वा: जक दयेकूगु जुइमा: । थुकीया साथय् पंचपुरी नं स्थापना या:गु धइगु खँ स्वयम्भू पुराणस उल्लेख जुयाच्वंगु दु । निर्माण कार्य सकतां सिधयेका कार्तिक शुक्लया पूर्णि (सकिमना पुन्ही)कुन्हु उगु चैत्ययात दशकर्म प्रतिस्था आदि सम्पूर्ण सिधकयेका बिज्यात । प्रतिस्थाकर्म सिधयेका गुला लिपा श्रावण ला ला:वल । थुगु श्रावण महिनाया ऋतुया आधारकथं वर्षाऋतु जुया देशय् दैवी प्रकोप, अतिवृष्टि, अशान्ति, उपद्रव जुइगु यक्व सम्भव दु । अजा:गु उपद्रवयात शान्तिस्वस्ति यायेया निमित्तय् शान्तिकराचार्यजुं सकल देशबासीपिन्त स्वयम्भूया चैत्याकारया महिमाया नापनापं अतिवृष्टि उपद्रवपाखें बचे जुइत त:धंगु उत्सवकथं अवलोकितेश्वर बुद्ध बोधिसत्वपिन्त बन्दना पूजना यायेगु दुर्भेक्ष मजुइकेत प्रणिधानकथं भावभक्ति यायेया निमित्तय् देशबासीपिनिगु सांस्कृतिक बाजागाजा धा: (गुँला बाजं) थायेगु स्तोत्र, त्तुत:, नामसंगीति आदि ब्वनेगु पा:ध्यायेगु याक्ल जुइमा: । थुकथं स्वयम्भू महाचैत्यया प्रतिस्थाकर्म सिध:गुया गुला लिपा स्वयम्भू ज्योतिरूपया चैत्याकारया महिमा कंगु व स्वयम्भूया दर्शनया नापनापं देशय् जुइगु उपद्रव, अतिवृष्टि, दुर्भेक्षपाखें बचे जुइगु उपाय गुला लिपा लोकजनपिसं उत्साहया स्वरूप ग्रहण या:गु धर्म जुयानिन्ति हे गुँला धर्मया नामं प्रख्यात जुयावंगु जुइमा: । ध्व गुँला धर्मस थाइगु धा: बाजं हे गुँला बाजं

धका: धायेगु यानावयाच्चंगु दु ।

ध्वहे अनुरूपं स्वनिगल्य् थ:थ:गु कथं ध्व गुँला धर्म हनावयाच्चंगु दु ।
ललितपतन यल देशय् श्रावण शुक्लया प्रतिपदा अर्थात् गुँलाध्व प्रतिपदाकुन्हुनिसें
बोगी बनेगु धका बहा बहीलय् स्थापना जुयाच्चं पिं बुद्ध बोधिसत्त्वपिन्त दर्शन पूजन
या:वनेगु निन्ति नसंचा उलेवं धा:(गुँला बाजं) नौबाजा आदि थाना चा:ट्यू वनेगु
प्रचलन थौतक नं विद्यमान जुयाच्चन । थये हे भक्तपुर (ख्वप), थिमी व नगां आदिस
नं थूगु हे अनुरूपं ल्यनाच्चनतिनी ।

ध्व गुँलाध्व पारूनिसें यंलाध्व पारूतकया दुने भी नेपा:मिपिसं त:गूमछि
नख:चख: क:घानावयाच्चंगु दु । ध्व ख: -

नागपंचमि

श्रावणशुक्ल पंचमियात् नागपंचमि धका धाइ । हिन्दुतय्सं माने
यानावयाच्चंगु ध्व चख: ख: । ध्व गरूडपुराणया आधार कथं थुकुन्हु भौतय् च्वयात:गु
नागया किपायात् थ:थ:गु मूलखाया फुसय् गोबरं तिका पंचामृतं पूजा याना श्रद्धाभावं
भक्त याइ । ध्व पूजा यानाया प्रभावं दच्छि तकया नागया भय् दइ मखु धइगु भावनां
जायाच्चंगु दु ।

थुखे बौद्धतय् नाग तिका पूजा याये म्वा:गु खनेदु । छाये धायेबलय् बौद्ध
धर्माबलम्बिपिनि न्ह्यागु हे पूजाक्रियाय् नं नाग साधना याना पूजा याइपिं जूगु
जुयानिन्ति थुकुन्हु नागपूजा यायेम्वा: धइगु प्रष्ट जू व: ।

न्येक् पुइके

स्वयम्भू महाचैत्यया स्थानय् दच्छिया दुने दिवंगत जुया वंपिनिगु नामं न्येक्
पुइकेगु बौद्ध महायानी बज्रयानीपिनि चलन दु । गुँलाध्व पारूनिसें यंलाध्व पारूतकया
दुने न्येक् पुइके:वनी । थूगु न्येक् पुइकेत पंचामृत पूजाभू तया केपू तया सिंगुया
बुद्धाचार्य पूजा याना दस्तुर कया न्येक् पुइकेगु ज्या याइ । ध्व न्येक् पुइकेगु नं च्वय्
जक वा क्वय् ग:चा:हिला पुइगु नं चलन दु । दिवंगत जुया वंम्हेसिया नामं नां कया:
मन्त्रोचरण याना न्येक् पुइ । न्येक् पुइकेगुया मतलब ध्व ख: कि दिवंगत जुया वंम्ह
दुर्गति जुइगु पाखें मुक्त जुया सत्गति प्राप्त जुइ धइगु विश्वास कथं ध्व न्येक् पुइकेगु

यानावयाच्वंगु खः।

ध्व न्येकू पुइकेगु प्रचलन गुबलेनिसैं वल धका दुल्लेबल्य स्वयम्भू महाचैत्यया उत्पति कालनिसैं हे चले जूगु धइगु सी दः वः । गुला धर्म प्रारम्भ जूगु समकालनिसैं थौतक नं अटूत रूप न्येकू पुइकेगु चलन दयाच्वंगु कारणं हे ध्व छँयात पुष्टिमयाः धका धायेमछिं ।

न्येकू पुइकेगु सम्बन्धय् श्रृङ्गेरी जातकय् थुकथं न्ययव्यातःगु दु ।

न्हापा शशिपतन धइगु दे दु । उगु देया अधिपति सिंहकेतु नां जुया च्वम्ह जुजु छम्ह दु । व जुजु नं ध्वहे गुँला लच्छियंकं न्येकू पुया, नमो बुद्धाय, नमो धर्माय, नमःसंघाय धका त्रिरत्न बन्दना याना चैत्य पूजा प्रदक्षिणा यानाच्वंगु जुयाच्वन । व हे देशय् ब्याढा छम्ह नं दयाच्वंगु व वया जहान नापं याना निम्हत्यपु जक दयाच्वन । उम्ह ब्याढा न्हिन्हिं जंगलय् वना आपालं प्राणीपिं स्याना चखुबखु चल्ला आदि स्याना जीबिका यानाच्वन । उम्ह ब्याढाया जहान धाःसा भातया ज्या खना छफुति हे चित्त बुझे मजूगु जुयाच्वन । बारंबार धाइ - भो स्वामी, ध्व प्राणी हिंसा यायेगु ज्या त्वताछुवयादिसैं । प्राणी हिंसा यायेगु ज्या तच्चतं बांमला धका बारंबार गंसां नं उम्ह ब्याढां व ज्यायात त्वतेगु साहस मयाः । उल्लां थः कलायात हक्का ब्वःबिया मेगु छु ज्या यायेगु ? जिं ला त्वःतीमखु धका न्हिन्हिं व हे ज्याय् लगे जुया आपालं वर्ष बिते जुल । छन्हू त्वता वनेमाःगु शरीर उम्ह ब्याढां प्राण त्वतल । कलाम्ह नं थः भातया नापं तुं सति वन । उपिं निम्हं थःथःगु कर्मभोगया आधारकथं थःथःगु लैपु लिनावन ।

हानं थूगु शशिपतन देशय् छम्ह ब्राम्हणया छँय् म्ये लहिना तःगु जुयाच्वन । उम्ह म्येया कोखय् ब्याढा प्वाथय् च्वंवन । ब्याढानी सत्य धर्मयात पालना याःम्ह जूगु जुयानित्तिं ब्राम्हणया कुलय् ब्राम्हणया प्वाथय् (गर्भय्) च्वंवन । उम्ह ब्राम्हणया मास पूर्ण जुया मचा बुल । थुकुन्हु हे लहिना तःम्ह म्येया नं मचा बुल उम्ह ब्राम्हणी मचा बःचाधिक जुसेलि मचायाके थःपिसं यानावःगु पुण्य सम्भार याना व मचायाके पूर्वानुस्मृति दयावल । व मचां सीकल कि ध्व जिमिगु छँय् दुम्ह चिकिचाधिकःम्ह म्येचा पूर्व जन्मया जिम्ह भात खः धका सीकाः उम्ह म्येचित बांलाक न्हिन्हिं बिचाः यानाच्वंगु जुल । तर ध्व खँ सुचुका तल । कथं थें उम्ह ब्राम्हणी मचा तःधिक जुया वसेलि व म्येचित ज्वःवनीम्ह व हे जुया वल । इलय् नकेगु त्वंकेगु

यानाच्चन । कथ थें ब्राम्हणीचा वा म्येचा ल्यासे ल्याय्महया अवस्था जुया वल ।

छन्हू सदां थें म्ये ज्वःवंबलय् जंगलय् थ्यंका म्येया लःत्वने प्यचाना खुसिइ वना लः त्वं वंबलय् गनं गनं धुं छम्ह वयाः म्येयात स्याना बिल । फुक्कं नया क्वय्य् क्वय्य् जक बाकि याना उम्ह धुं थःगु लें तप्यंका जंगलय् दुहाँ वन । थुखे ब्राम्हणी थःम्ह पूर्वजन्मया भात म्ये मखना उखेथुखे माःजुल । छथाय् खुसिया सिथय् क्वय्य् जक बाकि यानातःगु खना क्वथिइक स्वया थ्व जिम्ह म्येया अस्थि खःधका नुगः मछिंका खुसिया सिथय् च्वंगु क्वय्य् फुक्कं द्विचिना मुनाः उकिया छने सुवर्ण बालुका, चैत्य (फिया चैत्य) दयेका वन्दना याना चाःहुला उकुन्हु लिहाँ वया थः मां बौपिन्त फुक्कं वृतान्त कंगु जुल ।

कन्हय्कुन्हु नसंचा उलेवं उगु अस्थि दुने तया दयेकातःगु फिया चैत्यस छपू न्येकू अनहे तिया छपू न्येकू पुया नमो बुद्धय, नमो धर्माय, नमःसंघाय धका उम्ह म्येया नां कया पंचोपचार पूजा याना न्येकू पुया दुर्गतिमोचन जुया सत्गति प्राप्त जुइमाः धका न्हिन्हिं भावभक्ति याना च्वन ।

थथे धका नं प्रणिधान यात कि थ्व जिमि भातं पूर्वजन्मय् ब्याढा जुया आपालं प्राणीपिन्त स्याना प्राणी हिंसा याना दुःख बियाः जूगु पापं याना थुगु जन्मय् म्ये जुया जन्म कालं नं हिंसक जन्तुं स्याका प्राण हरण याके माल । जिं थुगु पूजा यानाया प्रभावं वं गुलिनं अपराध यानातःगु फुक्कं नाश जुया मदया वनेमाः धइगु भावना याना पूजा यानाच्चंगु जुल । प्रतिदिनं पूजा याना च्वच्चं ३१ स्वीछन्हूया दिनस म्ये जन्म कया च्वंम्ह ब्याढा ब्राम्हणीया प्रणिधान एकाग्रतां याना फुक्क पाप नाश जुया सुन्दर पुरुषया रुप धारण याना तियातःगु न्येकुतिं तिइजक पिहाँ वया पूर्वानुस्कृति दुम्ह जुया धन्य धन्य प्रिय, छंगु सत्बिचारं छंगु पुण्यया प्रभावं जि पापियात उद्धार यात । धन्य खः छ प्रीय धका हर्ष याना धाःगु खँ न्यना उम्ह ब्राम्हणी आश्चर्य चाया जिम्ह प्राणनाथ खः धइगु सीका थुपिं निम्ह निम्हत्यपु जुया आनन्दपूर्वक जीवन हनाच्चन ।

तः दँ तक दाम्पत्य जीवन हना च्वच्चं छन्हु उगु देशया जुजु परलोक जुया वसेलि फुक्कसिगु सहमति कथं न्येकूलिं उत्पत्ति जूम्ह उम्ह महापुरुषयात हे देशया अधिपति जुजु ल्यया भिंगु दिनय् राज सिंहासनय् तया राज्याभिषेक बिल । न्येकूलिं पिहाँ वःम्ह जुगुलिं श्रृङ्गेकुतु राजा धका नामाकरण यात ।

थुकथं ब्राम्हणी न न्येकू पुया पूजा याःगुलिं देया लानी तकं जूगु व थःम्ह पूर्व जन्मया भातया सकतां पापकर्म नास जुयावना देया तःधंम्ह जुजु तकं जूगुलिं न्येकू पुया पूजा यायेगु अति उत्तमगु भाःपा थ्व पुण्य भूमिइ नेपाःगालय् स्वयम्भूइ जक मखु भीगु थ्व स्वनिगःलय् हे थौतक नं चले जुयाच्वंगु दनी । थूगु परम्परायात म्वाकातयेत यलया जुजु लक्ष्मी नरसिंह ने. सं. ७५४ स छगु थिति दयेका दँयदसं १० गु त्वाःया पाःकथं न्येकू पुया नौबाजा थाना यलय् बोगी वनेगु प्रचलन न्ह्याका थकल । थ्व प्रचलन थौया अद्यापि तकं गुँला धर्म लच्छियंकं सुथ न्हापां बुद्ध बोधिसत्वपिन्त वन्दना पूजनाया साथय् पुरातात्विक वस्तुत अवलोकन याःवनेगु अद्यापि चले हे जुयाच्वनतिनी ।

थ्व न्येकू पुया सिना वंपिनिगु नामं जक पुइगु मखुसे देशय् महामारी, दुर्भेक्ष अकालमृत्यु, भूक्षय थें जाःगु प्रकोपयात नं शान्त यायेगु निमित्तय् नं थूगु पुइगु यानावयाच्वंगु खः । थ्व चलन ख्वप देशय् नं थूगु हे कथं चले जुयावयाच्वंगु दु । तर थौया युगय् वया थुजाःगु सम्भारया भीगु संस्कृति न्हावनीगु थिति न्ह्यःने दँ वयाच्वंगु दु । पश्चिमी सभ्यताया संस्कृतिं नेपाःया संस्कृतियात सीमदयेक न्हंका छवयेगु कुतः जुयाच्वंगु दु । थौया युवापिसं वाःचायेके माःगु छु धाःसा थ्व न्येकु बाजा, धाः बाजं, पयँताः आदि भी बौद्ध महायानी बज्रयानीपिनिगु मू बाजंयात गुकथं संरक्षण सम्बर्द्धन बिया भीगु संस्कृतियात म्वाका तयेगु ? थ्व विषयलय् बिचाः याये माःगु अत्यन्त आवश्यक जुइ धुंकूगु जिं तायेकाच्वना ।

गुण्पुन्ही (गुँपुन्ही)

थ्व गुँपुन्ही गुन्हूतक भोलाकं न्यायेकावयाच्वंगु जूगुलिं हे गुँपुन्ही धाः गु खः । गुँलाथ्व द्वादशीनिसें बहा बहीलय् बही द्यः ब्वयेगु चलन दु । अले व बही द्यः ब्वयेगु परम्पराया दुने आपालं गुथि गाना दयाः पूजा भावभक्ति यायेगु चलन नं मदूगुमखु । थ्व गुँपुन्हीकुन्हु गुता किसिमया बुबः -भुटि, मुस्या, ग्वःगु माय्, ग्वःगु मू, सिम्पु, मस्यां, चना, चिग्वः कय्गु, पँमाय् आदि दायेका क्वाति त्वनी । छुचू मझी छाना थुकुन्हु स्वनिगःया बौद्ध जनपिं स्वयम्भू महाचैत्यया दर्शन पूजन याःवनी । गुम्हं स्वयम्भूइ वने मफुपिं बौद्धजनपिं थःथाय् बहा बही व बुद्ध बोधिसत्वपिन्त दर्शन पूजन

याइ । अले छैय् वना नित्यादि पूजा सिधयेका च्वय् न्ह्यःब्वयागु क्वाति त्वनी । थ्व क्वाति त्वनाया प्रभावं प्वाःया विकार व रोग ब्याधि फुक्कं हे नाश जुयावनी धइगु विश्वास दु ।

थ्व गुँपुन्हीबलय् छगू छु धायेगु यानावयाच्चंगु दु धाःसा थुकुन्हु गुकः तक नयाः गुजू वसतं हिलाबुला याना पुना गुंगूबही सीकः वनेगु (बही छः स्वःवनेगु) धायेगु नं यानावयाच्चंगु दु । द्वादशीनिसें चौथि तक गुन्हूयंकं थी थी कथं ज्याभो न्ह्याना-च्वनी । ललितविस्तरया आधार कथं थुकुन्हु महामानव भगवान बुद्धं बोधिवृक्षया मुलय् च्वना बुद्धगयाय् तपस्या याना बिज्याःबलय् थुकुन्हुया दिनय् मार विजय याना बिज्याःगु दिन खः ।

श्रावणे पौर्णमास्या वै कामरागान विनिजयत् ।

परेशु दिवसेप्रातः स्कन्धमारादयाऽपिच ॥

स्कन्धमार काममार विजय याना बिज्यागु दिन खः । थ्व हे दिनय् यमपुर य् धर्म याना वंपिन्त उत्तर पाखेंया लुखां दुतयंका जटाधारी षदक्षरी लोकेश्वरया रूप दर्शन यांका त्रिज्यागु दिन जूगुलिं थुकुन्हु क्वाति त्वना, छुचूं मही नया बिहारय् ब्वया तइगु यमराजया विषयलय् च्वयातःगु प्रतिभराण्डो (पौभा) व बिलंपू (बिलंपौ) आदि प्रदर्शित यानातःगु स्वःवनी ।

थ्वहे भोलय् स्विनगःया किसानी (ज्यापु) तय् छैय् नी सी याना छुचूं मही, क्वाति, जा व प्यता घासा तया ब्यांजा नकःवनेगु धका थःथःगु बुँइ वना बुँया प्यकुंनय्सं जा भाग तःवनेमाःगु चलन नं थौतकं दया हे च्वनतिनी । थ्व ब्यांयात जा छाया नकः वनेमाःगुले धायेबलय् ब्यांजा नकेमाःपिं किसानतय्सं थुकथं धाइ । व ब्यांतय्सं वामाय् दाइपिं कीतय्त नया वामा बांलाक सप्रे यायेत मदत याइपिं जूगुलिं थुमित जा नकःवनेमाःगु खः धका धाइ ।

थुकुन्हुया दिनय् हिन्दू धर्माबलम्बिपिनि ब्राम्हणपिनि न्हूगु जनाइ हिलीगु जूगुलिं नं थ्व गुँपुन्हीयात रक्षाबन्धन जनाई पुन्ही धका नं धाइ । थुकुन्हु जनाई हिलेमाःपिनि छन्हू न्ह्यः नी सी याना सं खाना म्वःल्हुया पुन्हीकुन्हु थः पुरोहित ब्राम्हणपिं सःता वेद पाःथ्याका पुलांगु जनाई त्वःता न्हूगु जनाई चिना रक्षाबन्धन धका म्हासूगु कां (कुमोकां) ल्हातिइ न्याति हिंका मन्त्र ब्वनी । ल्हातिइ कुमोकां

हिनागुलिं याना शरीरय् दयाच्चंगु अनेक रोग ब्याधि नाश जुया फुनाबनी धइगु धापू दु ।

सापारू

थुकुन्हु भगवान बुद्ध बोधिवृक्षया मुल्य च्वना क्लेशमार मृत्युमार व देवमार आदि विजय याना बिज्यागु दिन खः । थुकथं गुंपुन्ही व सापारूया दुने प्यंगू मार विजय याःगु दिन खः । मार विजय याना बिज्याम्ह बुद्धयात पूजा याःवनेगु भावना हे बही छः स्वःवनेगु प्रचलन खः ।

थुकुन्हु हिन्दू धर्माबलम्बिपनि थुगु दँय गुलिनं सिनावं पिं दु थुपिं सकसियां सायाः छ्वयेमाःगु चलन दु । सायाः थुकथं छ्वइ ।

मनूयात भौया सायागु ख्वापाः तयेका ग्वाय् छुका जोगीयाना चिन्ता ज्वंका सा छम्ह नं छ्वयेगु यानावयाच्चंगु दु । सायाः छ्वयेगु बारय् हिन्दू धर्म कथं थुकथं न्ह्यःब्वया तःगु दु ।

दच्छिया दुने सिनावं पिं फुक्कं यमद्वारया पिने च्वनाच्चनी । अले सीपिनिगु नामं सा जुया वं पिं नकलि सायागु न्येकू नं थिना यमद्वारय् फुक्कं खापा चायेकी । अले सीपिं सकलें यमद्वारय् दुहाँ वनी धइगु हिन्दूतय् धापू दु । आपालं धन दुपिसं सीम्हेसिया नामं न्याम्ह खुम्हेसित सायागु ख्वाःपाः तयेका जोगी आदि भेष कायेका रामायण हायेकेगु धका लयात्मक रूपं दिवंगतया गुणगान याना सायाः छ्वयेगु परम्परा नं मदूगुमखु । फुक्क सायाः छ्वइपिनि ३६० पा स्वारी, मांपा, ढुल्चाय् मही, सिसाबुसा तथा सायाः वक्वःसित दान यायेगु परम्परा दु । थ्व सायाः छ्वयेगु चलन यैं, यल, ख्वप आदिस थःथःगु हे बिस्कं पह दु ।

च्वय् उल्लेख यानागु यैया कथं जुल । यलय् सायाः वनिपिं सकलें मंगलबजार य् मुना छकलं नापं वंसा ख्वपय् नं सकलें मुना देशय् दूगु बाजागाजा सहित नं वनी तर न्हाय्पं कथिया खःचा दयेका प्यम्हेसिनं क्वबिया च्वय्लाक्क दिवंगतया किपा घाना ज्वलिंज्वः वसः पुना बाजं थाना बय् पूया घिन्तांकिस्तिवाक्क धइगु बोल वयेका बाजं थानावइगु चलन ख्वपया खः ।

आः थ्व सायाः वइगु चलन गुबलेसनिसें दत, आःजक दूगु ला न्हापानिसें दूगु ला धका दुवालाः स्वयेबलय् थूगु विषय छगू धापू थुजाःगु दु कि न्हापा ३५२

दै न्ह्यः कविन्द्र जय प्रताप मल्ल जुजुया काय छम्ह मन्त । अले लानीं तसकं विलाप यात । सुनानं ह्ययेकां ह्ययेके मफु । जुजुं बिचा यात कि ध्व लानीयात चित्त बुभे यायेत जुजुं देशय् घण्ठा घोषणा याका ध्व दैय् सीपिं प्रजाया परिवारपिसं सीम्ह परि वारया नामं भोंया सायागु ख्वाःपातं पुया चाःहुयेका हयेमाल व थन लाय्कूलिइ नं हयेमाल धका घण्ठा घोषणा यासैलि उगु सः प्रजापिसं न्यना सीम्हेसिया नामं जुजुया लाय्कू जुना सायाः वनेगु यात । लानीयात नं लाय्कूया झ्यालय् तया क्यन । जुजुं का स्व लानी ! छम्हजक सन्तान मदूगु मखु थुलिमछि प्रजापिनि नं सन्तान मदये धुकल धका धासैलि लानीया मन याउँकल ।

सायाः थःथःगु ताःलं वइ । भोंया सायागु ख्वापाः तया नं वइ । गुम्हं वँय् जुया वइ । गुम्हं जोगी जुया वइ । जिगु मन बैरागी जुल धका नकलि जटा तया कमण्डलु व चिम्ता नं ज्वना वइसा हाकनं सा जक नं छ्वयेगु चलन दु । ध्वया भाव ध्व खः कि साया दुरू न्हिन्हं त्वंका लहिना तयाम्ह जिम्ह फलाना मन्त धका सा छम्ह जक जूसां क्यनावःगु भाव खः । थुजाःगु कथं सायाः वनेगु चलन हिन्दूतय् जक मखु अर्ध बौद्ध जनपिं नं लाः वः । गथेकि ज्यापु, खुसः, कौ, नौ, गथु, छिपा आदिपिं खः ।

ध्व सापारूया बारय् उगु ताकया शासकपिसं राजनैतिक बाक् स्वतन्त्रता बिया तःगु नखः धका नं धायेगु याः । व गुकथं धायेबलय् प्रजापिनि लाय्कूप्रति छु छु बिचार दु ? लाय्कूप्रति प्रजापिनि सन्तोष वा असन्तोष ? ध्व स्वयेगुया लागि नं गुन्हु तक न्हयाम्हेसियां न्हयागु हे धासां नं ज्वने मदु धका कानून दयेका ज्वनेगु निषेध यानातःगु दु । ध्वया कारणं ख्यालः दयेका थी थी कथं ब्यङ्ग याना वइ । जुजुयात नं ब्वःबिया वइ । प्रजापिन्त नं ब्वःबिया वइ । उगु ईया वर्तमान देया वास्तविक वातावरण छु गथे खः ? थःथःगु हे पहलं न्ह्यब्वया ख्यालः वइ ।

ध्व सापारूकुन्हु स्वनिगःया बौद्धजनपिं थुकुन्हु स्वयम्भू महाचैत्यया दर्शन यायेत सुथ न्हापां दनावनी । स्वयम्भू महाचैत्यया दर्शन पूजन याना आनन्दपूर्वकं चाःहिला थःथःगु छँय् लिहाँ वनी । थुखे गुँला बाजं खलःपिनि त्वाःया फुक्क मुना बहा बहीलय् प्रदर्शित यानातःगु बुद्ध बोधिसत्वपिनिगु मूर्ति व पौभा बिलंपू आदि पुरातात्विक बस्तु अवलोकन याःवनी । ध्वयात हे बही छः स्वःवनेगु धका धाइ । बही छः स्वयेथाय् बहा बहीलय् ब्वया तइगु पुरातात्विक बस्तुत-

यँया थःने विक्रमशील महाबिहार (थँबही)स लुँ आखः, वह आखः नं

चव्यातःगु सत्सहस्रिका पंचविंशति प्रज्ञापारमिता महत्वपूर्णगु बौद्ध ग्रन्थत दर्शन यायेत बही द्यः स्वःवनी, तापाकं तापाकंनिसें वइपिं लामागुरूपिं व विदेशी पर्यटकत आपालं वया स्वःवइ । थुगु लुँ आखः जक मखु सिंहसार्थ आजुया बिलंपू नं प्रदर्शित याना तइ ।

भास्करदेव कृत केशचन्द्र पारावर्त महाविहार (इतुंबहा)स लुँया आखःलं चव्यातःगु अष्टसहस्रिका प्रज्ञापारमिता व केशचन्द्र आजुया ऐतिहासिक बिलंपू प्रदर्शित जुयाचवनी । पुरातात्विक बस्तुत विभिन्न देवदेवताया सिँया मूर्तित नं प्रदर्शित यानातइ । उगु लुँ आखःया प्रज्ञापारमिता पाःथ्या वनेमाःगु केशचन्द्र गुथि नं स्थापना यानातःगु दु तर थौकन्हय् वया च्यान्हू तक पाःथ्या वइपिं गुरुपिन्त भोजन याकेगु चलन दूगु खःसा आः वया उगु गुथिया बुँ फुक्कं बालियाःगु कारणं याना ध्व गुथि नं न्हनावनीगु अवस्थाय् दयाच्वंगु दु ।

राजकूल महाविहार (लाय्कूबही)स करिब ५ फुट ति तःधिकम्ह लुँया द्यः महा भारतया कृष्णं क्यंम्ह विश्वरूपया मुति खः । स्वये हे यइपुसे च्वंम्ह व्वयातइ । ध्व विश्वरूप आपालं फाइन जुया आपालं पुलांम्ह नं खः । ध्व हलुमान ध्वाका लाय्कुलि व्वये हःम्ह खः ।

नदीसंगम महाविहार(खुसिबही)स दकसिबय् स्वये लाइकगु तेमां ख्वाःपा धका तःपाःगु ख्वाःपा छपा दु । थय्क स्वयेबलय् भैलःद्यःया ख्वाःपा थें च्वं । ध्वया नापनापं पुलांपुलांगु वसः न्हापा न्येय्कू (५०) पर्सि सिनेमाःबलेया पर्सि खः । अथेहे पुलां पुलांगु ज्वलंत नं व्वयातइ । खतु ध्व मल्लकालया वसः खः । ध्व तेमां ख्वाःपा धाःगु सुयागु ख्वाःपा धका न्यने कने यानाबलय् अन बिहारया शाक्यजुपिसं ध्व ख्वाःपा वीरकुश महाराजाया ख्वाःपा धका धायेगु यानाच्वंगु दु । वीरकुश महाराजाया ख्वाःपाया विषय वीरकुशावदानय् वर्णन यानातःगु अनुसारं छपा न्हाय्पं लासा थें लाया छपा न्हाय्पं फांगां थें फायेज्यू धका वर्णन यानातःगु अनुसारं ध्व पाय्छि धकाःधायेमछिं ।

थूगु अनुरूपं बहा बहीस बुद्ध बोधिसत्त्व दीपंकर आदि जक मखु बिहार बही पतिकं छगू छगू अजाःगु अजू चाइपूगु पुरातात्विक बस्तुत व्वयातइ ।

गुंलां बहीद्यः ब्वयातइगु थाय

१. यताबहा	२. श्रीःघःबहा	३. मुस्याबहा
४. छुस्याबहा	५. थःबही	६. इटुंबहा
७. जनबहा	८. मखंबही	९. लाय्कूबही
१०. मरूबही	११. लगंबहा	१२. न्हाय्कंबही
१३. च्वाकंबही	१४. नःबही	१५. मूबहा
१६. खुंबहा	१७. खुसिबही	

स्वयम्भूइ निसला छाये

गुंलागाःया द्वितीया वा तृतीयाकुन्हु स्वयम्भू महाचैत्यस न्हिन्हं वयाःच्वंपिं गुंला बाजं खलःत गुलि दु अर्थात् ग्वःध्वः दु ? इपिं सकसियां निसला छायेगु अनिवार्य दु । द्वितीयाकुन्हु वयेमलाःपिं तृतीयाकुन्हु वइ । स्वयम्भू महाचैत्ययात निसला किभू, सिसाबुसा, महीचही आदि थःगु यथा श्रद्धां छायेमाःगु छाया पूजा आज्ञा, तुतः ब्वनाः, परिक्रमा याना श्रद्धाभाव प्वंकी । हानं शान्तिपुरय् नं मद्यमांस सहितं तया पूजा याना गुंला बाजं खलःपिं सकसियां भोय् नइ । गुम्ह गुम्हेसियां गुथि हे दयाच्वंगु दुसा गुम्ह गुम्हेसियां ल्हापं तया भोय् नयेगु यानावयाच्वंगु दु । यैया बहा बहीस नामसंगीति तुतः ब्वनाच्वंपिनि नं क्वापाः द्यःयात धौबजि छाया पंचामृतं पूजा यायेगु चलन दयाच्वंगु दु । थन जक मखु यल, केपू, ख्वप, थिमि आदि थासय् नं थ्वहे चलन थौतक नं दयावयाच्वंगु दु ।

यैया पंचदान

नभकृष्ण त्रयोदस्या युगादौदेव पूजन ।

क्वाथपिवे ततोदानं बौद्धाचाराय दीयते ॥

गुंलागाःया त्रयोदशी अर्थात् श्रावण कृष्णया त्रयोदशीया दिनयात युगचहे नं धाइ । थ्व दिनयात कलियुग उदय जूगु दिन घका सिइका वयाच्वंगु दु । थुकुन्हुया दिनय् दीपंकर बुद्ध व बुद्धया धर्मयात क्वातुक्क ज्वनाच्वंपिं धर्मय् आस्था तयाच्वंपिं

बज्राचार्य, शाक्यजुपिन्त पिण्डपात्र, वा छ्व, कय्गु, सिसाबुसा, दक्षिणा आदि दान याइ । थ्व यें व छ्वपय् थुकुन्हु हे पंचदान बी । तर यें व छ्वपय् थःथःगु हे बिस्कं पह दु ।

पंचदानया छुन्हु न्ह्यः छेंय् छुखाँ नी सी याना छः ब्वइ । फतिंफक्व बांलाक किंकिनी जाल प्यना सिसाबुसा महीचही आदि तया बालांक छःब्वइ । पंचदान गुथि दुपिनि नं छः ब्वया पंजरौ जा (क्षीर) थुइ । कन्हेकुन्हु (पंचदानकुन्हु) स्वयम्भू महाचैत्ययात दर्शन याना पूजा याना स्वयम्भूस बिज्यानाच्चपिं गुरु बज्राचार्य व शाक्यपिन्त गच्छे अनुसारं दान प्रदान याना छेंय् लिहाँ वना थः थाय् ब्वया तइम्ह बुद्ध भगवान लोकेश्वर व चैत्य आदियात थः गुरु गुरुपिं सःता पूजा याका पंचदान बिइगु ज्या जुइ । थ्व छः ब्वयेगु बज्राचार्य, शाक्य व तुलाधर थ्व स्वंगू जातिपिनि जक ब्वयेगु याइ । अले थःथः जजमानपिं थः गुरुपिन्थाय् केपु ज्वना (पंचदान ज्वलं ज्वना) वनी । अले गुरुपिसं केपु तःवःपिन्त क्षीर स्वारी, मार्पा व गुम्ह गुम्हसियां अय्ला नं त्वंका हइ । गुरुजुपिन्थाय् जजमानपिन्थाय् पंजरौ फःवनी । पिण्डपात्रावदानया आधारकथं थ्व पंजरौया दिनय् गंक्वाति दायेका त्वनेमा धका नं न्ह्यःब्वयातःगु दु । गंक्वाति धइगु फ्वयामतःगु गंगु गुता किसिमया बुबः खः ।

थ्व पंचदान बिइगु सुथनिसें बहनी तक न्हिच्छियंकं पंचदान फःक्वःसित बियाच्चनी । श्रावण कृष्ण द्वितीयाकुन्हु यलय् मतयाः वक्वसिनं छु छु छानावनागु खः व श्री स्वयम्भू ज्योतिरूपयात नं छाः वयेमाः । उकुन्हु चानसिया २ ता इलय्निसें हे स्वयम्भूस आपालं म्वः म्वः जुयाच्चनी ।

बौया छ्वाःस्वयेगु

गुँलागाःया औसी आमावास्या अर्थात् श्रावण कृष्णया औसीयात बौया छ्वाः स्वयेगु औसी धका धाइ । थूगु दिनयात गोकर्ण औसी धका नं धाइ । “बुद्धोक्तः पाराजिकाय्” थथे धका न्ह्याब्वयातःगु दु ।

श्रावण च आमावास्यां मातृदर्शेव आत्मजैः ।

मानयेत्पितरं चैव तथैव लभते फलम् ॥

दिवंगत पितुर्नाम्ना गोकर्ण नाम तीर्थके ।

तद्दिने स्नानदानाच सुसन्तान फलंलभेत ॥

॥ गुँला धर्म ॥

ध्व दिन महत्वपूर्णगु दिन जूगुलिं काय् म्हयाय्पिसं बौयात हर्ष पूर्वक माने याना मानसम्मान् बिया श्रद्धापूर्वकं इच्छा दूगु नकेत्वंकेगु याना खुसी यायेगु चलन खः । बौम्ह सन्तोष जुया काय् म्हयाय्पिन्त शुभ-आशिर्वाद बिइवं काय् म्हयापिन्त फल प्राप्त जुया महासुख प्राप्त जुइ । यदि बौम्ह परलोक जुइ धुंकल सा दिवंगत बौया नामं पुण्य तीर्थ (गोकर्ण तीर्थ)य् बना स्नान दान व पिण्ड उद्धार याना बिल धाःसा मभिगुं गति - प्रेत गति, नर्कगति, तिर्यक्गति आदिइ लानाच्चंसां नं अन्तराभवय् लाना च्वंसां नं मुक्ति प्राप्त जुया सुखावति भूवनय् लाःवनी । ध्व खँ स्वयम्भू पुराणया तीर्थमहात्म्य पुण्य तीर्थ अवदानय् नं बांलाक न्ह्यब्वयातःगु दु । अथे जुयानिन्तिं थुकुन्हु गोकर्ण तीर्थस मेला हे जुयाच्चनी । स्विनिगःया नेवाः जक मखु अन्य वर्ण जातियापिं नं वया पिण्डदान आदि याःवइपिं आपालं दइ ।

पारूभोय्

यँलाध्व प्रतिपदा अर्थात् भाद्र शुक्लया प्रतिपदा (परेवा)यात गुँला धर्म क्वचाःगु दिन धका धाइ । लच्छियंके न्हिं न्हिं स्वयम्भू महाचैत्यया सेवा यानाच्चंपिं गुँला बाजं खलःत, दापा खलःत जक मखु भक्त श्रद्धालु न्हिंन्हिं छेके वयाच्चंपिं फुक्कसियां थुकुन्हु भगवान बुद्धयात पूजा याना शान्तिपुर आदि पूजा याना भोय् नया वयेगु परम्परा दु । भक्तजनपिनि लच्छियंके छु नं छुं त्वता तइपिं धायेबलय् गुह्येसियां ला नयेगु त्वतुसा, गुम्हेसियां अय्ला, गुम्हेसियां धुम्रपान त्वता तइ । उकुन्हुया दिनय् शान्तिपुरय् पूजा याना फुकेयाइ । सकसियां हर्ष, उमंग, रहर याना लच्छिया सेवा क्वचायेकी ।

ध्व गुँला लच्छिया दुने सिलु तीर्थया नं मेला जूगुलिं उकुन्हुनिसें सिलुम्ये हालेगु याइ यंला ध्व पारूनिसें यंला लगे जुल धका संगीत प्रेमी दाजुकिजापिसं मालश्री लय्यागु म्ये हालेगु नं याइ ।

ध्व गुँला धर्म समाप्तिकुन्हु स्विनिगःलय् बहा बहीलय् नं तुतः नामसंगीति ब्वना गुँला बाजं थाना थःथःगु बिहारया क्वापाःद्यःयात धौबजि छाना पूजा याना गुम्हगुम्हेसियां थुकुन्हु गुथि न्यायेका गुँला धर्म समाप्तिया रहर बहर याना क्वचायेकी ।

थुकथं नेवा: बौद्ध जनपिसं गुँला लच्छिया दुने थ:थ:गु संस्कृतिया बाजागाजा थायेगुनिसें कया बौद्ध परम्परा रितितिथि नख:चख: हना बुद्ध बोधिसत्त्वपिनिगु महिमा, स्त्रोत्र, तुत:, नामसंगीति आदि पा:थ्याना आध्यात्मिक संस्कारयात ल्यंका तये भनं न्ह्यानाबनाच्चंगु भीगु गुँला धर्म ख: ।

थुथाय् छगू दु:खया खँ छु धा:सा भौतिक संस्कार थौकन्हय् हाबी जुयावयाच्चंगु दु । थौकन्है बौद्ध जनपिनि गुँला जोछि तुत: पछिमा, पर्यंता:, चचा स्यने सयेके मयेके धुंकल । थौकन्हय् पप संगीत, रक संगीत, च्याप संगीत आदिया बाजं थायेगु यानाहयाच्चंगु दु । थथे छाये जुल ? धका बिचा यायेबलय् भीगु संस्कृतिया महत्व भीगु कला कौसलताया विशेषता सुइतं ध्वाथुइक कने मफूगुया दसू ख: । भीगु समाज संकुचित जूगुया दसू ख: । सुनं मनू सयेकेसीके धका व:पिन्त धायेमज्यू, स्यनेमज्यू, देखा कायेमा: देखा मदयेक छुं नं यायेमज्यू धका स्यूपिसं मकंगु व कना मवंगुलिं इच्छा दया नं सयेके मखनावंगु ख: । बाध्य जुया कर्किया संस्कार संस्कृतियात याउँक नाला कायेगु बाध्यता जुयावंगु ख: ।

अथे नं भीसं ध्व नाला कायेमा: कि भी नेवा: बौद्ध धायेत् गर्भ दयेकेया निन्तिं जक जूसां भीगु आध्यात्मिक थ:थ:गु परम्परा संस्कृतियात म्वाकातयेमा:गु अत्यावश्यक जू व: ।

भीगु दयनीय जीवनय् आर्थिक, राजनैतिक, सामाजिक, भौतिक आदि न्हयागु हे विसंगतिनाप सामना याये मा:सां नं थ:गुत्वया नामय् नेवा: बौद्ध समाजयात म्वाकेया नामय् भीगु संस्कार संस्कृति रितिरिवाज नख:चख: आदि लोकं ह्वा:गु परम्परायात म्वाका:तये मा:गु अत्यावश्यक जू व: । थुजा:गु नेवा: बौद्ध समाजय् महत्वपूर्णगु संस्कार संस्कृति दुबालेबलय् ध्व गुँला धर्मया दुने गुलि नं यानावयाच्चनागु रितितिथि नख:चख: परम्परा दु, ध्व तसकं महत्वपूर्ण जू ।

यलदे (ललितपुर)

यें छकोय् दक्षिणय् लाःगु उप महानगरपालिका यल देशस गुँलाध्व पारु निसें यलाध्वया पारुतक गुँला धर्मयात बौद्धजनपिसं गुकथं हनावयागु दु कोय् छसिकथं न्ह्यब्वये ।

गुँलाध्व पारुकुन्हु १० गू बिहारस बोगी वनेधकाः गुँलाबाजं (धाः) नौबाजा थानाः न्यकुबाजा पुयाः नसंचाउलाः लछियंकं बोगी वनेगुयाइ । नेपाःया थःगु सम्बत्सर तिथिमिति गणना अनुसार न्हापांगु महीना खः “थिला” । थूगु थिलानिसें ल्याःखायेबलय् श्रावण महीना घइगु च्याला फुना गुलाय् क्यंः, उकीं च्याय् हाइगु व च्याला फुना गुला क्यनीगु ध्व तसकं मभिं घाइगु चलन दु । थूगु अरिष्ट दोष निवारणया निन्ति नं गुँलां विशेष धर्मकर्म याकातःगु खनेदु । सम्राट अशोकं थः गुरु भिक्षु उपगुप्तलिसे थःगु सम्बोधि यात्राया भोलय् थः श्रीमति तिष्यरक्षिता व म्हयाय् मय्जु चारूमति ब्वना श्री स्वयम्भू महाचैत्य दर्शन पूजनया निन्ति थन बिज्याबलय् यल शहरयागु गौरव वृद्धिया निन्ति पेंगू युग उदय जूगु पवित्र दिनयात लुमंका “प्यंग्वः थूर” स्थापना याना थकल । उगु थूरया प्रतिष्ठापन शुभकार्य नं ध्वहे गुँला महीनापाखे जूगु दु घाइ ज्योतिषविद् आचार्यपिसं गुँला महिनायात श्रावण धका प्रसिद्ध याना बिल । कारण छाये धाःसा भी गृहस्थिपिं अप्वः याना विषय प्रपंचय् जक भुलय् जुया धर्मकर्म यायेमलापिं अजाः पिंगु निन्ति सर्वप्रथम धर्मय् मन लाकेत धर्म श्रवण यायेगु याकेगु भालपा गुँला महीना अप्वः याना धर्मयागु चर्चापरिचर्चा न्यनेगु, न्यंकेगु उत्तम महीना जुया श्रावण घयातःगु जुला उपयुक्त कारणं गुँला महीना लच्छि जक जूसां भीगु मभिंगु संस्कार न्हंकेत भिंगु संस्कार पाखे छयलेया निन्ति भीगु ध्व दश इन्द्रियं धर्मकार्यस ज्वजलपेगु आवश्यक खंका भीत धर्म कार्यस गुँला महीनां अप्वः अभ्यास याकातःगु खनेदु । धायकि मिखां - बुद्ध बोधिसत्वपिनिगु मूर्ति, चित्र , पौभा, धार्मिक हलंज्वल, स्वःवनेगुया रुपय् बहीधः स्वःवनेगु यानातल ।

यल पंचदान

स्वनिगःया बौद्धजनपिसं हनावयाच्चंगु मध्ये ललितपतन यल देशय् जक हनावयाच्चंगु गुँलाध्व अष्टमि अर्थात श्रावण शुक्लया अष्टमियात हे यल पंचदान

धका न्यायेकावयाच्वंगु परम्परा खः । ध्व गुबलेनिसैं धायेबलय् यक्व दै न्ह्यः सर्वानन्द जुजुया पालनिसैं थुगु परम्परा न्ह्यानावयाच्वन धइगु सी दःवः ।

सर्वानन्दनृप जातकया आधारकथं भगवान् दीपंकर बुद्धयात् पंचामृत युक्तगु क्षीर गुलुपातय् थनाः छ्व, कयगु, मुस्या, माय् आदि न्याता किसिमया बृहि सहितं तया दान याना बिज्याःगु दिन खः । गुंलाथ्व अष्टमिया दिन खः । ध्व पंचदानया अर्थ कथं बिचाः यायेबलय् ध्व खँ प्रष्ट जू वइ । पं धइगु पृथ्वीस, जः धइगु बुयावःगु अन्न आदि दान बिइगु बांलागु दिन थूगु अष्टमि खः । न्याता दान यानावयाच्वंगुलिं हे ध्व अष्टमियात् पंचाष्टमि नं धायेगु याः ।

पनर्दीपावति राज्ये सर्वानन्देन धिमता ।

निर्मित्वा दानशालादि व्रीद्यादि विविधाणिना ॥

सर्वानन्द जुजुयां लिपा अनहे त्वाल्य् च्वंम्ह व्याहा (इहिपा) मयाम्ह ब्रम्हचारी मय्जु थकुमति शाक्य भिक्षुनी न्हिच्छि शील्य् च्वना बुद्धया परमभक्त जुया च्वंम्ह उम्ह मिसां थूगु उत्तमगु दिन गुंलाथ्व अष्टमि (श्रावण शुक्लया अष्टमि) कुन्हु दीपंकर तथागतयात् निमन्त्रणा याना वसपोलया संघगण सकसितं दानशाला ग्वयाः पिण्डपात्रय् पंचामृत सहितगु क्षीर थना पंचबृही सहित नं द्रुहलपा दान यात । जीवनया अन्त्य तक दान प्रदान याना थःगु सर्वश्व अर्पण याना दैय्दसं दान प्रदान यायेगुया निमित्तय् गुथि दयेका स्थापना यानाथकल । मृत्यु पश्चात् उम्ह दानी मय्जु थकुमति शाक्य भिक्षुया मूर्ति (सालिक) ब्वया अष्टमिनिसैं बाःछियंकां गुइतः बहालय् ब्वयाः प्रदर्शित यायेगु प्रचलन थौतक नं दया हे च्वनतिनी । ध्वहे भोलय् धंःला हिति, तःग्वः जाकि, चिग्वःजाकि नं प्रदर्शित यानातइ । थुगु तःग्वः जाकिया विशेषता छु धायेबलय् न्ह्याक्व हे जहान परिवार दःसां छग्वः जक जाकिं सकसितं नयेत गाइगु जाकि खः धइगु न्यनातयागु खः । थुकिया जा थुइबलय् मनू स्वया लः जक अप्पः तयेवं गाः धइगु किम्बदन्ति दयाच्वंगु खः ।

सर्वानन्द जुजु व गुइतः नकीया परम्परायात् कःघाना थौया अद्यापि तकं यल देया बौद्धजनपिसं बौद्ध धर्मयात् श्रद्धावान् जुयाच्वं पिं बहा बहीया बज्राचार्य शाक्य भिक्षुपिन्त दैय्दसं पंचदान बिइगु चलन थौतक नं चलेजुयाच्वंगु दनी । ध्व पंचदान यें स्वया भिन्न जूगु खने दःवः । प्रत्येक बौद्धपिनिगु छेंय् वा लाछिइ फलिचाय् पंचदान बिइगु यानाच्वनी । बहा बहीया भायाआजु(स्थवीर, थाय्पा)पिं बिज्यात् धायेवं अनपिसं

पूजा याका बसपोलपिन्त नं पंचदान बिया अले मेपिं सकसितं पंचदान बिइगु परम्परा थौतक नं ल्यना हे च्वनतिनी । दानया महत्व आपालं दु । छता छता दानया छता छता महत्व दु ।

यलया मतया:

गुँलागा:या द्वितीया अर्थात् श्रावण कृष्णया द्वितीयाकुन्हु यलया मतया: धका भिगू त्वा:या पा:कथं गुगु त्वा:या पा:ख: उकुन्हुया दिनय् सुथसिया स्वता: इलं निसें यल देया चैत्य, बुद्ध, बोधिसत्व, अवलोकितेश्वर व देवदेवीपिं दयाच्चनी, उगु थासय् तकं चा:हिला थ:थ:गु यथाश्रद्धां दक्षिणा व महीचही, सिसाबुसा, देवा, धूं, धुपाँय् व थ:गु समूह समूह मिलेजुया ज्वराज्वरा वसतं पुना: भोजन आदि छायावयेगु चलन दु । बाजागाजा धिमे, पछिमा, धा:, बय्, बासुरी आदि पुया उगु दँया दुने सिनावपिनिगु नामं जक मखु म्वानाच्चपिं नं थ:गु श्रद्धा प्वंक: वनेगु थूगु पुण्य तिथिस चा:ह्युवनेगु अत्यन्त फलदायेकगु धइगु सीका भावभक्ति जायेका श्रद्धाभाव तया मतया: वनेगु चलन थौतक नं चले जुयाच्चनतिनी ।

मतया: धका छाये धाल ? धइगु विषयलय् यलबासीपिसं थथे नं धायेगु यानावयाच्चंगु दु कि भगवान बुद्ध बोधिवृक्षया मुलय् तपस्या याना च्वंबलय् मारगणपिं वया तपस्या भङ्ग यायेत यक्व प्रयत्न यातं नं छुं हे चास लगेमजूगु जुयानित्तिं मार गणपिं हारेचाया बिसिवंगु व दशदिग्लोकपालपिं वया भगवान बुद्धया विजयया महोत्सवकथं मत च्याक: व:गु दिन जूगुलिं थूगु दिनयात मतया: धका धा:गु ख: । अत: थुजा:गु दिनयात लुमंकेकथं लोकजनपिसं मत बिया पूजा याना मतया: न्यायेकेगु थौतक नं यानावयाच्चंगु ख: धइगु अनपिनिगु धापू दयाच्चंगु दु । तर थौकन्हे सिनावपिनि परिवारपिनि जक अनिवार्य रुपय् मतया: वनेमा:गु परम्परां थाय् कयावयाच्चंगु दु, ध्व गथे जुया थूगु रुपय् हिल ? ध्व बिचा: याये मा:गु खँ ख: ।

गुँला ज्व:छिं यानावयाच्चंगु

न्हेपनं - बही बिहारय् पूजापाठ, स्तोत्र, भजन, गीत, आदिया शब्द न्यनेगु व लिसें धर्म श्रवण बाखँ न्यनेगु ।

न्हासं - पूजोपकरण बस्तु पुष्प, धूप, दीप एवं फलमूल, पकवानया सुगन्ध वास

नत्वना, सांसारिक विषयया वासना मद्य, मांस, धुम्रपानया वासना तापाकालि सत्धर्म चेतना हयेगु ।

म्हुतुं - सूत्र, मन्त्र, धारणी, स्तोत्र ब्वना अवाच्य वचन मल्हासे केवल सत्य, शान्ति, प्रियधर्म वाक्य जक प्रयोग याना सत्धर्म चेतना हयेगु ।

म्यें - पूजाया प्रसाद ग्रहण याना मद्य, मांस, धुम्रपानया रस मकासे सत्धर्म नीगु जक आहार याना सत्धर्म चेतना हयेगु ।

ल्हातं - जपमाला, कमण्डलु, पुस्तक, बज्रघण्ट, ताःयागु ज्याय् संलग्न जुयालि परन्तु प्राणीयात सास्ति यायेगु व खुया कायेगु, कपिं मिसातयगु म्ह्य स्पर्श मयासे सत्धर्म चेतना हयेगु ।

तुतिं - अपवित्रगु स्थान गमन जुइगु त्वःता बहा, बही, गुम्बा, तीर्थ आदि पुण्यक्षेत्रस विचरण जुया सत्धर्म चेतना हयेगु ।

लिंगं - थः स्त्री पुरूषया पाखेया जक संतुष्ट जुया अब्रम्हचर्या मयासे सत्धर्म चेतना हयेगु ।

म्हं - भिंगु, मांगलिक उपहार बस्तु बज्र, बज्रघण्ट, ताः, डमरू, छत्रध्वज, पताक आदि धर्मवस्त्र, काषायवस्त्र स्पर्श याना सांसारिक विलास सामाग्रीपाखें अलग जुया सत्धर्म चेतना हयेगु ।

चित्तं - काम, क्रोध, लोभ, मोह माया, अहंकार भाव त्वःता श्रद्धा, त्याग, शील, भय, श्रुत, वीर्य, प्रज्ञा, करुणा ब्वलंकेगु, त्रिशरण, बोधिचित्त अनुस्मरण याना सत्धर्म चेतना हयेगु ।

थुजाःगु प्रकारं सत्धर्म चेतना जागृति हइगु महत्वपूर्ण पर्व दिन पुण्यतिथिया शुभ संयोग चूलाःगु अति पवित्रगु दिन भालपा भीसं गुँला लच्छिया दुने छु छु कार्यक्रम न्ह्याकावयाच्चवना धइगु विषययात कया आः थन छसिकथं छगू छगूया संक्षिप्त परिचय थन न्ह्यब्वयाच्चवनाः-

१) तीर्थस्थान

सुथन्हापां ब्रम्हमुहूर्तय् नसंचा इलय् दना बागमति वना तीर्थ स्नान याइ ।

२) चैत्य भक्ति

बुद्ध बोधिसत्व एवं स्वयम्भू चैत्य धर्मधातु, बज्रधातुया अग्रे च्वना यथाशक्य पूजा भावभक्ति याना प्रदक्षिणा यानाच्चनी ।

३) नामसंगीति पाठ

त्रिकालया बुद्धपिसं प्रशंसा यानातःगु, गुरु महामञ्जुश्रीयागु विशेष महत्व दयाच्वंगु, असंख्यं तःधंगु सूत्र आर्यनामसंगीत सुमधूर घोषं भक्तिपूर्वक लय् तथा चैत्यपुंगभया न्ह्यःने च्वना छगू स्वरं ब्वनाच्वनी ।

४) भजनकीर्तन

बिहारय् अथवा सतःफलय्, ननिइ, लाछिइ, चुकस च्वंगु चैत्यया न्ह्याःने च्वना दापा भजन, नसंचा भजन मुना भजनकीर्तन जुयाच्वनी, गुगुंथासय् ज्ञानमाला भजन नं जुयाच्वनी ।

५) बुद्धपूजा

गन गुगुंथासय् बुद्ध मूर्तिप्रतिष्ठान जुयाच्वनी, अन उगू थासय् श्रद्धालु भक्तजनपिसं यथाशक्त पूजाभावभक्ति यानाच्वनी ।

६) सत्धर्म पाठ

गुलिसियां बहा, बही अथवा थःगु छैय् च्वना जूसां सत्धर्म सूत्र - प्रज्ञापार मिता, दश भूमिश्चर, सधर्मपुन्दरीक, लंकावतार, तथागत गुह्यक, सुवर्णप्रभा एवं ललितविस्तर, गण्डव्यूह, पंचरक्षा, कारण्डव्यूह, गुणकारण्डव्यूह, बोधिचर्यावतार आदि धर्मग्रन्थ पाठ यायेगु, याकेगु जुयाच्वनी ।

७) धारणी ब्वने

बिहारय् अथवा धर्मागार गुम्बास च्वना धर्मपासापिं मुंका यथाविधि अनुसार आकाशघातु प्रणिधाननिसें शुभारम्भ याना आर्य भद्रचरी ब्वना अपरिमिता धारणी आदि ब्वनेगु, ब्वंकेगु याइ ।

८) बोगी बनेगु

सुथ न्हापां दना बुद्धगीत हाला थाय्थासय् च्वंगु चैत्य स्थान अथवा बिहार बिहारय् बुद्धगीत हाला चैत्य प्रदक्षिणा याना परिक्रमा याइ ।

९) श्रृङ्गभेरी/न्येकू पुये

अतीत कालया राजा श्रृङ्गकेतुया धर्मपत्नी सुशीला महारानी नं गुगु प्रकार न्येकू पुया चैत्य भक्ति याना उद्धार जुयावन धइगु अवदानया कथन् अनुसारं थूगु कथं चैत्य भक्ति यायेगु असंख्य तःधंगु भालपा परम्परागत थौतक नं न्येकू पुया चिबहा चाःहुलेगु यानाच्वन ।

१०) लः छायेगु

स्वयम्भू चैत्ययात थःथपिंगु श्रद्धानिशचय अनुसार पुष्प, धूप, दीप आदि फलमूल, स्कन्द छगू लख प्रमाणं लाख धका द्रुहलपिगु याइ । मेगु अर्थय् लःपुई छायेगु धका देवीदेवताया मूर्तिस रंगरोग यायेगु धयातःगु दु ।

११) लुचिछः थाये

“लक्ष्य चैत्य” निर्माण विधि अनुसारं चैत्य चिबहा चिची ग्वःयाना थासाय् थाना आपाः संख्या दयेकेगु अर्थात् सवालाख थ्यंकेगु प्रमाणं लुचिछः (लक्ष्यचैत्य) थायेगु, थाकेगु याइपिं नं दु ।

१२) छत्रारोहण

शुम चैत्य, स्थूल चैत्य, विशाल चैत्यप्रति श्रद्धाभक्तिपूर्वक छत्र चढे याइगु, “चौ” छायेगु, इलां प्यनेगु, थुकीया नं थःगु अलग विधि दु ।

१३) मयन् छत्रारोहण

छत्रारोहण विधि स्वया मयन् छत्रारोहण विधि असाधारण जू । खतु थुकीया संक्षिप्तिकरणया रूप्य “दीपयात्रा” मतयाः वनीबलय् सीयागु छत्रया रूप्य “सीस्वां” दयेका छायेगु चलन मदूगुमखु । थुकीया नं थःगु हे विधि दु ।

१४) यःअबसं

यः अबसं धइगु लच्छियंकं न्हिं छछाः जक नयाःअबसं च्वनीगु खः । अप्व याना यःअबसं च्वनीपिं स्वयम्भू, चोबहा, बुंगय् छेके बनीगु चलन दु ।

१५) न्यान्हू अबसं

गुँला लच्छिया दुने न्यान्हूइ छकः छकः याना अबसं च्वनीगु खः । थुकी नं अथेहे स्वयम्भू, चोबहा, बुंगय् छेके बनीगु चलन खः ।

१६) माय् अबसं

गुँला लच्छियंकं बिहारया मूलदेवता क्वापाःजुयात नित्य स्नान याकीगु देख्ये चायेकीगु, अभिषेक जल पालं यानाच्वनी तर थुमिसं मेमेगु छुं हे अन्न वस्तु मन से निराहारं च्वना क्वाःपाजुया थासय् जक थातं च्वनाच्वनी । उखेंथुखें गनं नं वनीमखु, वने नं मज्यू थुकीया नं थःगु इतिहास दु ।

१७) उपोषदन्नत

“उपोषदन्नत” धइगु अमोघपाश लोकेश्वरयागु उपासना आराधना याना

अष्टमि ब्रत धलं दनीगु खः । थुकीया नं थःगु हे विधि दु ।

१८) बहापूजा

खतु यलय् करीब निसःगू बहा दु । अथे नं यलया प्रमुख बिहार “भिंच्यागू बिहार” खः । उगु बिहार बिहारय् वना थःथः परिवार समूह जक मुना बहापूजा वनीगु चलन दु । गुलिसियां थूगु पुण्य कार्यस त्वाः बहायापिं श्रद्धालु भक्तपिं मुंका वाद्यवादन सहित उल्लास उमंगपूर्वक पंजरौ ज्वलं छाया बहापूजा वनी ।

१९) त्यागशील धर्म

मेमेगु इलय् ब्यलय् त्यागशील धर्म पालना याये मफुसां परन्तु गुँला लच्छि जक जूसां थःम्हं फुफुयें ला, न्याँ, खें, अय्ला, थ्वें, बजां, चुरोट त्वःताच्चनी । गुलिसिनं छलकपट व लोभ बढे जुइगु, असत्य खें ल्हायेमालीगु ज्या बन्दब्यापार यायेमखु धका धः, काता, तालाजु, अमृतकं थीमखु धका अलग च्वनीपिं दु । अन्न आमिष पदार्थ लाभा, छा, प्याज तकनं मनइपिं दु । हानं गुलिसिनं सिंकि, गुन्दु, साकिचा समेत नइमखुपिं नं दु । अथे हे थः श्रीमति जूसा “गुँला लच्छिया छपाः लासाय् च्वनेमखु” धका ब्रम्हचर्या शील पालन याइपिं नं मदुगुमखु । थः परिवारयात जूसां “छाक्क वचन” ल्हायेमखु धका मौन धारण याइपिं नं दु ।

२०) गुँलासेवा वने

गुँला लच्छिया तुतः खलः पासापिं मुना सुथ न्हापां दना चोबहा छेके वना तुतः व बुद्धगीत हाला लच्छियंकं छेके वनी । अथेहे बुंग व स्वयम्भू नं वनेगु चलन दु ।

२१) छेके वने

गुँला लच्छिया थःगु जीविकोपार्जनया ज्याखँ फुक्क हाकुतिना आम्दानी श्रोत तकं त्याग याना न्हापनं दना बागमतिइ वना थाय्थासय् प्रसिद्ध देवस्थलय् बान्हि स्वफः ईतक जूसां नये पित्यासां उखेथुखे तातापाक जूसां छेके वनाच्चनी ।

२२) गुँलां लाभा प्वलीमखु

गुँला लच्छिया दुने “गवःगु लाभा चैत्यया आकार प्रकारलिसे मिलेजू” धका श्रद्धा आस्था तया लाभा प्वलीमखुपिं दु । अज्ज चिबहाया किचः तकं हांचां मगाइपिं नं मदुगुमखु । गनं वनेच्वनेबलय् चिबहायात आदर तया जःपाखे लाका चिबहा चाःहुलावनीपिं नं दु । चीबहाफलय् वसः पायेगु तक नं याये मज्यू धका आदर सम्मान्

तइपिं नं दु ।

२३) पञ्जाष्टि/यल पंजराँ

श्रावणशुक्ल अष्टमिकुन्हु थःगु बिहार बिहारय् अथवा छैय् छैय् दीपंकर आदि बुद्ध बोधिसत्त्वपिंगु मूर्ति ब्वया धर्मशाला थें फयांफच्छि बांलाका शोभावृद्धि याना आगन्तुक भिक्षुसंघ शाक्य, बज्राचार्य, ब्रम्हचर्यभिक्षु, श्रामणेर, चैलक आदि वन्देजुपिन्त विधिपूर्वक दान प्रदान जुयाच्चनी । लिसें त्वाः, बहालय् दानगाथा ब्वंगु मधूर ध्वनी उच्चारण जुयाच्चंगु सः तायेदयाच्चनी । थुकुन्हु क्वतः व पिन्पाँ ज्वनावःगु उखेंथुखें खनेदयाच्चनी ।

२४) जा पूजा

पञ्जाष्टमि न्ह्यकुन्हु “दानदत्तगुथि” हनी । मामाःथाय् बिहार बिहारय् “बहीद्यः ब्वइगु थासय्” “जा पूजा” धका छगू अलग थितिरिति हनाच्चनी ।

२५) जुगः पंजराँ

श्रावण कृष्ण त्रयोदशिकुन्हु नं यल पञ्जाष्टमि थें तुं दानप्रदानया चहलपहल उत्सव जुयाच्चनी । थुगु प्रथा खास याना यल देश बाहेक यें, ख्वप आदि गांगामय् तक नं जुगः पंजराँ मानेयानाच्चनी ।

२६) जुगःया स्वयम्भू छेके वने

ध्वहे जुगः पंजराँया दिनय् स्वनिगःया श्रद्धालु भक्तजनपिं श्री स्वयम्भू धर्मधातु बागीश्वर स्थानस छेके वःपिं व पंजराँ दान काःवःपिंगु लस्करं आपालं हुलमुल जुयाच्चनी । थुकुन्हु यलया मतयाः खलः सकलें अनिवार्य रूपं छेके वयाच्चनी । थुकुन्हु स्वयम्भूया छगू तःधंगु पर्व धाःसां ज्यू ।

२७) नागपूजा

श्रावण शुक्ल पंचमिया दिनस बासुकी आदि नव नागराजपिंगु विशेष गुणयात लुमंका “नागपाश” नागचित्र च्वया लुखा फुसे तिकाः आदरपूर्वक पूजा सत्कार जुयाच्चनी । सर्वथा नागराजपिंगु प्रकोप शान्त जुया सदां शुभिक्ष मंगल जुया, च्वनेमा धका कामना याइ ।

२८) पिन्पाँ थने

गुँलाया विशेष पर्व दिन अष्टमि, पुन्ही संल्हूकुन्हु थःथःपिंगु बही बिहारय् प्रतिष्ठापित दीपंकर आदि बुद्ध बोधिसत्त्वपिन्त थःथःगु गच्छे अनुसारं पिण्डपात्र थनेगु

ज्या जुयाच्चनी । बुद्ध धर्म्य पिण्डपात्रया थःगु हे विशेष महत्त्व दयाच्चनी ।

२९) क्वन्तिइ नवबाजा थाये

दैय छकः जुइगु मतयाः खलकं गुँपुन्हि न्ह्यकुन्हु बहनी सदाशिव मृत्युञ्जय क्वन्ति महाद्यःया अग्रे च्वना नवबाजा थाःवनीगु चलन दु ।

३०) क्वाति त्वने

श्रावण शुक्ल पंचदशिकुन्हु ललिचा सहित गुता प्रकारया बूबः दायेका सुपथ्यगु बिशेष पर्व खः । थ्व क्वाति सेवन यानागुलिं स्वास्थ्यया निन्ति आपालं हितकर जू धाइ ।

३१) सिसाबुसा दान

श्रावणकृष्ण प्रतिपदा सापारुकुन्हु थःथःपिंगु त्वाः बहालय् च्वंपिं उपस्थित इष्टमित्र दाजुकिजा तताकेहें मस्तमिसापिन्ति कयगु फवया, तुसि, पासि, फौसि आदि फलमूल दान बिइगु चलन दु ।

३२) साखःति त्वंके

मतयाः, बहापूजा वयाच्चनीपिं भक्तजनपिनिगु सेवा सुश्रुषा निन्तिं इमिगु स्वास्थ्ययात फाइदा जुइ धइगु मति नं सुं पिपी, व मले तया साखःति त्वंकेगु याइ ।

३३) प्यंगवः थूर काःवने

सम्राट अशोकं थःगु सम्बोधि यात्राया भोलय् लुम्बिनीइ बिज्यागु इलय् श्री स्वयम्भू महाचैत्य दर्शनार्थ नेपाःया उपत्यकास बिज्याबलय् यल देयागु शान्त बातावरण खनाःथूगु थाय्यात अति पवित्र भाःपा शाक्यमुनि बुद्धया शारिरीक, अस्थिधातु,सहित याना थन प्यंगू दिशाय् प्यंगवः थूर स्वनाथकूगु जुल । थ्वहे पवित्र स्तूप थूरप्रति श्रद्धाभक्ति तया थौतकं नं प्यंगवः थूर प्रदक्षिणा याःवनेगु चलन जुयाच्चन । थ्व यलया थःगु हे विशेषता खः ।

३४) धंजलिया हिति स्वःवने

गुँपुन्हीकुन्हु दीपावति नगर गुइतःया प्रथमोच्च श्री महाबिहारस “धर्मञ्जय यात्रा प्रणालिका” धइगु धंजलिया हिति स्ववनेगु चलन दु ।

३५) प्याःपुखू छिये

लग्ख्यलं उत्तरपाखे च्वंगु बालार्चनदेव संस्कारित “ज्येष्ठवर्ण महाबिहार”

तंगः बहाया ल्यूनेपाखे लानाच्वंगु छगू ऐतिहासिक पुखू दु, व खः “प्रयाग पुखू” ।
थुगु पुखू छियेगु यानावयाच्वंगु दु ।

३६) धर्मोपदेश न्यने

गुँला महीना धर्म श्रवण यायेगु विशेष उत्तम धका करूणामयं नरक उद्धार याःगु खँ व “कर्मविपाक निर्देशन कर्मफल” खँ कनातःगु गुणकारण्डब्यूह बाखं कंकेगु न्यनेगु चलन दु । लिसैं मेमेगु धर्म ग्रन्थया व्याख्या याकेगु नं याः ।

३७) यमद्वार दर्शन

नरकोद्वारक “श्री जटाधारी लोकेश्वर” धर्मराज बिज्यानाच्वंगु तंगः बहाया ल्यूनेसं च्वंगु यमद्वार दर्शन व पूजन यायेगु चलन दु । ध्वया न्ह्यःनेसं च्वनाः सीपिनिगु नामं मत छ्वयेकःवनेगु चलन दु ।

३८) सीपिनिगु नामं मत छ्वयेकःवने

थुगु वर्षय् थः परिवारया सुं नं दिवंगत जुल धाःसा इमिगु नामं “दुर्गतिमोचन” जुइमाः धइगु कामना याना तंगःबहालय् च्वंगु यमद्वारया न्ह्यःनेसं च्वनाःसच्छि च्याप्वाः मत छ्वयेकिगु चलन दु ।

३९) चिबहा चाःहुले

गुँला धर्म आरम्भ जुसानिसैं गुँला धर्म समाप्ति मज्जतले छन्हू हे बितेमजुइक निरन्तर रूपं सुथ न्हापां दना चिबहाया छचालं बँपुना सफा सुघर याना, चिबहालय् नीलखं लुना यचुसेपिचुसे च्वंक सिला, न्हूगु कापतं हुया, चिकं नं इलाः, बांलाकेधुनेवं यथाश्रद्धां धूँ धुपाय् च्याका, चाकःमत छ्वयेका भिं भिंगु बांलागु स्वांमाःलं व्वखायेका चिबहाया सेवा यानाच्वनी । लिसैं थःगु अधिष्ठानकथं “रत्नकेतु धारणी” ब्वना नीछकः अथवा सच्छि च्याकः चैत्य प्रदक्षिणा याइपिं नं मदुगुमखु ।

४०) चिबहा न्ह्यःने दण्डवत्

गुलिसियां चिबहा चाःहुले थें तुं थःगु अधिष्ठान कथं पञ्च प्रणाम अथवा अष्टाङ्ग प्रणाम याना म्हधू दाइपिं नं दु ।

४१) स्वांता छाये

स्वयम्भू चैत्ययागु गुणानुस्मरण याना थःथःगु त्वाः, बहालय् च्वंगु चैत्यक चिबहा आदिस भक्तिपूर्वक बांलागु भिंगु स्वांया प्रकारान्तर उखेंथुखें मालाहया स्वां छप्वः छप्वः जक छाया जूसां भक्ति याइपिं नं मदुगुमखु । खतु थूगु स्वां द्वहलपिबलय्

पुष्पकेतु धारणी ब्वनेगु नं चलन दु । प्रसंगवस् थुथास स्वांया विशेष महत्व खँ
न्ययब्बयाच्चवना । गथे-

१)	उपव स्वानं	विद्या बिइ
२)	च स्वानं	काम बिइ
३)	जी स्वानं	भाग्य बिइ
४)	केशर स्वानं	रूप बिइ
५)	दाफ स्वानं	सुख बिइ
६)	चम्पा स्वानं	शत्रु नाश जुइ
७)	नागपुष्प स्वानं	शत्रु परास्त जुइ
८)	कमल स्वानं	लक्ष्मी बिइ
९)	कुशेशय स्वानं	ऐश्वर्य बिइ
१०)	हयाउँपले स्वानं	लक्ष्मी उदय जुइ
११)	पले स्वानं	श्रीवृद्धि जुइ
१२)	रूपकेशरी स्वानं	शुभलाभ जुइ
१३)	पुंनाम स्वानं	शान्ति जुइ
१४)	पारिजात स्वानं	शत्रु नाश जुइ
१५)	पारिभद स्वानं	आयु वृद्धि जुइ
१६)	अपराजि स्वानं	विद्या लाभ जुइ
१७)	करवीर स्वानं	मोक्ष लाभ जुइ
१८)	अश्वय स्वानं	शोक हरण जुइ
१९)	कुशुम स्वानं	वस्त्र लाभ जुइ
२०)	केतकी स्वानं	मोक्ष बिइ
२१)	म्हासूगु करवीर स्वानं	रत्न लाभ जुइ
२२)	बधू स्वानं	वस्तु उपलब्ध जुइ
२३)	जिफवः स्वानं	मोक्ष बिइ
२४)	पातली स्वानं	पुष्टि जुइ
२५)	अल्लिका स्वानं	अन्न लाभ जुइ
२६)	कोबिदार स्वानं	शान्ति जुइ

२७)	मधु स्वानं	मधुवस्तु बिड
२८)	लुंगजू स्वानं	सुगन्ध प्राप्त जुइ
२९)	काशिक स्वानं	काशिवस्त्र लाभ जुइ
३०)	करञ्ज स्वानं	कलह शान्त जुइ
३१)	किंशुक स्वानं	उत्तम बस्त्र लाभ जुइ
३२)	करणिका स्वानं	रत्न लाभ जुइ

थुगु स्वांताया पुण्य प्रशंसा स्वयम्भू पुराणय् उल्लेख यानातःगु दु ।

४२) सख्वाः पाये

थुगु सख्वाः पायेगुया थःगु हे महत्त्व सुधालेपन विधि पुस्तकस च्वंया तयातःगु दु । चिबहा चैत्य आदिस भक्तिपूर्वक सख्वालं पायेगु याना चैत्यया शोभावृद्धि याना सेवा यायेगु नं चलन दु । खतु सख्वालं पायेगु विशेष पर्व दिन कतिपुन्हिकुन्ह सकभनं यानावयाच्चंगु खनेदु ।

४३) चाकःदलु मत छ्वयेके

गुंलाया विशेष पर्व दिनय् चैत्यया छ्चालं चाकःदलु मत छ्वयेकेगु चलन दु ।

४४) पादार्घ बिये

गुलिं भक्तजनपिसं पंचबुद्ध श्री स्वयम्भू चैत्यया चरणकमल “पादुका” लुमंका पंचरत्न अर्घ सामग्री समेत तया निर्मल तीर्थजल सहित याना स्वस्ति वाक्य ब्वंका नीछ्कः अथवा सच्छि च्याकः पादार्घ द्वहलपिइ । अले ध्व हे पादार्घ जल अभिषेक कायेगु बियेगु चलन दु ।

४५) मतयाः वने

श्रावण कृष्ण द्वितीयाकुन्ह यलया सम्पूर्ण बहा, बही, कच्चाबहा व मेगु ननि, चुक, गल्ली, लाछि, लिबि, क्यब आदि स्थानस च्वंगु बुद्ध बोधिसत्त्व व चिबहा, धर्मधातु, बज्रधातु दर्शन व पूजनया निन्तिं दीपयात्राया रूपय् मतयाः वनेगु चलन दु । थूगु मतयाःया भोलय् द्रलंद्रः भक्तजन यात्रुत समावेश जुयाच्चनी । थूगु मतयाः वनेगु कन्थया नीतिनियम यितिरिति थःगु हे धंगं बाद्यवादन सहित न्ह्यानाच्चनी । थन उगु मतयाःया संक्षिप्त गतिविधि उल्लेख यानाच्चना । “दीपयात्रा” मतयाःलय् उपस्थित जुइपिं विशाल जनसमूह श्रद्धालु भक्तजनपिसं थःथःगु मनोवाञ्छा अनुसारं श्रद्धाया

उपहार वस्तु थथे प्रस्तुत जूगु खनेदु -

- १) सर्वप्रथम गुरू बज्राचार्यपिनिगु छगू समूह न्हयःने च्वनावइ । उगु समूहलय् मार्ग निर्देशकया रूपय् मतयाःया कमाकन्थ स्यूपिं गुरूजुपिं न्हापालाक च्वनी ।
- २) ध्वयां ल्यू धारामण्डल थिलावइ ।
- ३) लियां ल्यू प्वतासं च्वयावइ ।
- ४) धूप मकः ज्वना अष्ट सुगन्ध धूप थनावइ ।
- ५) अनंलि पञ्चोपचार पूजा सहित याना क्वतः ज्वना पूजा याइ ।
- ६) ध्वयां ल्यू चौछत्र व ध्वाय् छायावइ ।
- ७) ध्वया नापं वस्त्रया रूपय् जजंका छायावइ ।
- ८) ध्वयां ल्यू चामर पेखेरं गालावइ ।
- ९) अले थनंलि मुनिवर बचनया सन्देश कथं बज्रघण्ट थानावइ ।
- १०) ध्वयां ल्यू अष्टाङ्ग प्रमाणया रूपय् म्हधू दानावइ ।
- ११) ध्वयां ल्यू बुद्धप्रति महान स्वागत सत्कारया निन्तिं जूगु लुम्बिनी वनस बुद्ध जात्राया प्रतिकया संस्मरण कथं जुयावंगु छगू उदाहरण स्वरुप थथे ज्याभोः न्ह्याकी । गथे-
- १२) ब्रम्हाया प्रतिनिधिकथं तुफि छायावइ ।
- १३) विष्णुया प्रतिनिधिकथं शंख पुयावइ ।
- १४) महादेवया प्रतिनिधिकथं डमरु थानावइ ।
- १५) ईन्द्रया प्रतिनिधिकथं चौछत्र छायावइ ।
- १६) यमराजया प्रतिनिधिकथं सर्पदण्डी ज्वनावइ ।
- १७) वरुणया प्रतिनिधिकथं जलधारा हायेकावइ ।
- १८) अग्नि देवया प्रतिनिधिकथं धूपमकः ज्वनावइ ।
- १९) वायुदेवया प्रतिनिधिकथं ध्वाय् छायावइ ।
- २०) कुवेरया प्रतिनिधिकथं पंचरत्न व दक्षिणा छायावइ ।
- २१) सरस्वतीया प्रतिनिधिकथं बसाः कापः छायावइ ।
- २२) भिक्षुया प्रतिनिधिकथं चामर उखेरं गाःनावइ ।
- २३) गन्धर्व किन्नरया प्रतिनिधिकथं बाजं थाना प्याखं हुला म्येँ हालावइ ।

- २४) देवकन्याया प्रतिनिधिकथं ताय् अबिर ह्वलावइ ।
 २५) अनाथपिण्डकया प्रतिनिधिकथं पिण्डपात्र द्दहलपावइ ।
 २६) सुजाताया प्रतिनिधिकथं क्षीरपात्र छायावइ ।
 २७) पृथ्वीमाताया प्रतिनिधिकथं निसलापाः छायावइ ।
 २८) नागकन्या जलकन्याया प्रतिनिधिकथं भारी व शंख ज्वना अर्घ बियावया-
 च्वनी ।
 २९) चन्द्र सूर्यया प्रतिनिधिकथं सुगन्ध दीप कपूमत च्याकावइ ।
 ३०) नमुचियापरिवारया प्रतिनिधिकथं पंचस्कन्ध विनाशया रुपय् पंचज्ञान स्वरुपं
 पंचसूत्र इताःमत बियावयाच्वनी ।
 ३१) आरोग्य प्रदानया रुपय् ग्वलः, हलः, बिहलः, अम्बः छायावइ ।
 ३२) अमृतपानया रुपय् साखःति लुनावयाच्वनी ।
 ३३) धर्माकर माकःया सेवाया रुपय् किंशुक वनजात फलमूल छायावइ ।
 ३४) भक्तजनपिसं गुणकिर्तनया रुपय् पत्र पत्रिका पुस्तिका छायावइ ।
 ३५) भक्तजनकीर्तनया रुपय् विविध बाजं खलः वयाच्वनी ।
 ३६) भोजनया रुपय् भोय्ब्व, महीब्व छायावयाच्वनी ।
 ३७) मुखशुद्धिया रुपय् मसला, ग्वाः, ग्वय् छायावइ ।
 ३८) सिद्धमहीया रुपय् निसलामही छायावइ ।
 ३९) मार विजयया रुपय् विविध पुष्पया आकार प्रकारगु ह्वः फ्याना तःगु
 मतयाःमही छायावइ ।
 ४०) भक्तजनपिसं पञ्जरौज्वलं व अष्टमाङ्गलिक उपहार वस्तु छायावइ ।
 ४१) मतयाः खलःया प्रमुख दानपति कजि नं मतयाःया ज्याभो ब्वचाल धइगु अर्थय्
 तःप्वाःगु वहःयागु दिवा ज्वना विधिपूर्वकं अर्घ बिया सुसम्पन्न याइ ।
 ४६. बाजं बने

मतयाःया “दीपजात्रा” सम्पन्न जूगु लसताय् थःथःगु बिहार बिहारं हर्ष
 उल्लासपूर्वक पुण्यानुमोदनया रुपय् बाजं खलःत वया मतयाः विसर्जन जुल धइगु
 सन्देश ब्यूवयाच्वनी ।

४७. दमखिं बाजा चाःहिले

बुद्धया न्हातिकाया रश्मिं अभिनिष्क्रमण जूपिं दशक्रोध भैरवया प्रतिनिधि

स्वरूपं जुया पिहाँ वःम्ह भैरब व थ्वया शक्ति काली व महालक्ष्मी जःखः तया सम्पूर्ण मार दमनया निन्तिं प्रकट जूम्ह भैरबं सिंहनिरनादया सन्देश न्यंकूगु शब्द खः-
“भ्याजक भ्यादम् फट् निफ दम्, दम् फ दम्, दभ्यां दम् भ्यां दम् भ्यां” थूगु मन्त्रोचार णया तात्पर्य आश्रयं थ्व भाव स्पष्ट याःगु दु कि - “सम्पूर्ण क्लेशमार उत्पत्ति स्थान अज्ञान व क्लेश थूगु निगू पक्षयात समूलविच्छेद याना हूं फट् याये धुकूम्ह वसपोल बुद्ध भगवानयात अभिवादन व्यक्त यानाच्वंगु” धइगु अर्थ जुल ।

थूगु दमखिं बाजा बोगी व मतयाःया प्रमुख बाजा माने यानावयाच्वंगु जुल । थूगु बाजाया सहायक परिचारिक खः “नवबाजा” । थ्वहे नवबाजा मंगः लायकूया लुँझ्याःया क्वसं अनिवार्य रूपं थायेगु यानावयाच्वंगु दु । खतु धाःबाजा व दमखिं बाजा त्वाःया दबू दबूपतिं वना नं सन्देश न्यंकवनाच्वंगु दु । थ्व छगू परम्परा नेपाःया थःगु हे विशेषता दयाच्वंगु महत्वपूर्णगु प्रदर्शनी खः ।

४८. लुँ सफू दर्शन

बुद्धोपदेशित चयप्यद्वोल धर्मस्कन्धया सारभूतगु “प्रज्ञातत्त्व” उच्चकोटी दर्शन ज्ञानया मूल तत्त्व विषय सविस्तार वर्णन जुयाच्वंगु “प्रज्ञापारमिता” सफू खः । अतिकं महत्वपूर्ण दर्शनीय, श्रवणीय, स्मरणीय, चिन्तनीय, मननयोग्य दर्शन शास्त्र प्रज्ञापारमिता अतीकं श्रद्धा गौरव तया पूजा सत्कार याये योग्यगु खः । विशेषं थूगु पुस्तक सिंहकल्प नगर धालसां प्रज्ञापुरी महानगरया प्रमुख बिहार थंबहीया तःधं सफू लुँया मसिं रञ्जना लिपिं च्वयातःगु नीलपत्र सतसहस्रिका प्रज्ञापारमिता दर्शन याः वनेगु परम्परा दूगु खः । थूगु ग्रन्थ महायान बौद्ध जगतय् अतिकं प्रसिद्धगु ऐतिहासिक सत्धर्म ग्रन्थया रूपय् स्वागत सम्मान् यानावयाच्वंगु खः । खतु थूगु अमूल्य ग्रन्थ गुरू महामंजुश्री नं च्वयातःगु खः धइगु परम्परागत जनविश्वास दयाच्वंगु जुल । तर थुकी प्रारम्भिक स्वंगू पेज जक मंजुश्री गुरू च्वयातःगु धाइ । मेगु ब्याक्व पण्डित जिनश्रीज्ञानजुं अति परिश्रम याना ने. सं. ३४४ सालं सम्पूर्ण यानातयातःगु खः ।

४९. लै ज्या याये

मतयाः, बहापूजा वनीपिनिगु निन्तिं सुख सुविधाया लागि बहा, बही, ननि, चूक, गल्ली, क्यबस प्रतिष्ठापित चैत्य चिबहाया जःखःच्वंगु लै स्यनाच्वंगु, पःखा आदि दुनाच्वंगु मर्मत कार्य जुयाच्वनी । लिसें दुर्गन्ध फोहर सुचपिचु यायेगु ज्याय्

फूम्ह फूगु चाःगु हारगुहार याना सुधार कार्य सम्पन्न याइ ।

५०. तिसा सिलेज्या याये

गुंला महिना अप्व श्रद्धालु भक्तजनपिं वया स्वःवइगु जुयानिन्तिं छः छःपिनिगु अलंकार तिलहिल फोहरमैला सफा यायेनिन्तिं तिसा सिलेज्या जुयाच्चवनी ।

५१. लः पुई छाये

छःया काष्ठमूर्ति, मृत्तिकामूर्तिस रंगरोगण याना बांलाकातःगु मूर्तिं स्यनाच्चंगु अथवा रंग ब्वलाच्चंगु भिंकेया नितिं रंगरोगण विधिकथं नवजीव दान याये थें बांलाकेगु ज्या जुइ ।

५२. पंजराँ छः

बिहार बिहारय् च्वपिं अथवा पंजराँ गुथिया सम्येछः कुर्याँपाजु, चकँछः, दीपंकर बुद्ध व अन्य मेमेपिं ताराछः छःपिं यथायोग्य प्रमाणं छः ब्वया लिसें इलां पौभा समेत तया पंजाष्टमि ह्यःकुन्हु हे आदर सम्मानपूर्वक ब्वयातइ । लिसें ध्वया ह्यःनेसं जाभु नं न्ह्यच्याकातइगु चलन दु । ध्वया गुथिहारपिनि पाठ याकेगु नं चलन दु ।

५३. फूछःआजु चाःहुइके

“फूछः आजु” नं दीपंकरया रूपय् मानेयानातःगु दु । तर थूगु मूर्ति मेमेगु बही बिहारय् दइमखु केवल रूद्रवर्ण महाबिहार, उकुबहालय् जक दु । थूगु मूर्ति यल पंजाष्टमि छन्हू जकया लागि पिहाँ बिज्याइ । गुलि नं पंजाष्टमिया दानदत्तगुथि चलेजुयाच्चवनी । अनं उगु थासय् थुम्ह फूछःआजु यंका दान बिइकेगु चलन दु । वसपोल फूछःआजु दकले लिपा दान काःवनीम्ह जुया थुम्ह छःयात फूछःआजु धायेगु चलन दूगु खः ।

५४. बुधवाः छेके वने

गुंला लच्छिया न्याकः बुधवाः चूलाइ उकुन्हु बौद्धपुरी बदेगांया “बुधवाः छः” छेके वनेगु याइ । थन हे मतयाःया सम्पूर्ण भक्तजनपिं छेके वनेगु नं चलन दु ।

५५. गुइतः नकीजु स्वः वने

गुइतःलय् छम्ह अति श्रद्धावानम्ह बहुत दुःखकष्ट सियाच्चम्ह सर्वानन्द राजाया सम्यक् पंजराँ याःबलय् स्वःवःम्ह छम्ह नकीजु दूगु खः, वयागु लुमन्तिकथं दयेकातःम्ह पुलाम्ह नकीजु स्वःवनेगु चलन खः ।

५६. गुइतःलय् न्हापां पंजरौ फयेगु

उम्ह गुइतः नकीजुयागु नामं बियावयाच्चंगु दानदत्त दकले सकले न्हापां दान फःवनेगु चलन दु । तर थुम्ह नकीजुयागु श्रद्धार्पण दानदत्त छुं मनसे दान कावनेमाः धइगु नं छगू परम्परा अनुश्रुति चले जू ।

५७. पताः छाये

गुँलाया विशेष पुण्यतिथिस बिहारया देगलय् बहीया पुलनिसें शोभाय्मान जुइक पताः छायेगु याइ । लिसें छत्र, ध्वज, पताक, इलां आदि द्रव्यपीगु नं चलन दु ।

५८. महादी ग्वराधी स्वने

गुँला धर्म प्रारम्भ जुइवं अथवा बहीद्यः ब्वयेवं “ग्वराधी खः” ग्वया “ग्वराधी महादी मत” च्याकेगु नं चलन मदूगुमखु ।

५९. दान गुथि हने

पंजाष्टमि व जुगः पंजराँया दिनस दानदत्त गुथिया कजि अथवा थुवाः गुथिहारपिंगु थःथःगु छैक्वसं अथवा सतः, फलय्, दिगी, चपाःया ब्वसं च्वना थः पुर्खापिनिगु दानदत्त गुथि लोप मजुइमा धइगु मत्तिइ नं यथाश्रद्धा चतं नं छतू जक जुसां दान बियाच्चनी ।

६०. सत्तु ग्वःजा दान

सत्तुचूर्ण, नैक्या, छोहरा, सुकुमेल, ध्यः, कस्ति, साखः ल्वाकछ्याना न्हाया सत्तुग्वःजा दयेकातःगु गुँलाया लसताय् दान बिइगु चलन दु ।

६१. जीगः बिइगु

बहीद्यः ब्वइपिं गुथिहारपिसं थःथःपिनि बहीद्यः ब्वयेधुंका पूजा याये धुनेवं बहीद्यः ब्वयेया लसताय् आगन्तुक उपस्थिति जनपिन्त समेबजि दान बिइगु चलन दु ।

६२. सुचिनिचि याये

गुँला आरम्भ दिननिसें समाप्त मजूतले न्हिन्हिं सुथ न्हापां दनालि थःथःगु छैया पिखालखुनिसें नीलखं हाहा याना बँ थिलेगु नं चलन दु । थुकी याना छैय् शुद्ध पवित्र जुल भाःपिइ ।

६३. निसला ब्वये

गुँलाया अन्तिम दिनस थःथःगु बिहारया मूल देवता क्वाःपाःजु, गन्धूरी देवता व सम्यक् देवताया अग्रे निसलापाः ब्वये यंकी अथवा बिहारया स्थबीर आजुपिं व गुरू बज्राचार्यपिन्त निसला दान बिइ ।

६४. धर्मपासा म्हिंते

धंजलियाःया दिनस फलफूल दान बिइगु इलय् “अवदय” थूगु प्यंग्वः आखः अंकीतगु गट्टा ह्वाना थःथःपिनिगु दिनदशा अथवा कर्मविपाक फल छु छु खः धइगु भविष्य लक्षण अनागत सन्देश सीकेगु निन्तिं धर्मपासा म्हिंतेगु याइ ।

६५. बहीद्यः स्वःवने

नेवाः बौद्ध संस्कृति परम्पराकथं बहीबिहारय् प्रदर्शन जुइगु मूर्ति, चित्रकला, पौभा, चिबहा, साधिक वस्तु, पूजाया हलज्वलं एवं विविध प्राचीन लिपि अंकीत सूत्र, तन्त्र ग्रन्थ तथा महत्वपूर्ण कलात्मक दुर्लभ वस्तु सलंसारय् तया ब्वया तःगु त्रिर त्नालोक पुण्यकीर्ति स्वःवनेगु चलन दु । धयातःगु दु “उगु पवित्र प्रदर्शित धार्मिक कलात्मक वस्तु दर्शन स्पर्शन चिन्तन मनन यानागुद्वारा प्राप्त जूगु पुण्यानुभावं सत्धर्म चेतना जागृति जुइ धइगु परम्परागत जनविश्वास खः ।

यलय् गुँलां बैद्यः ब्वयातइगु थाय्

१. चिंकबही	२. ओमबहा	३. ज्योबहा
४. ईबही	५. धपगाःबही	६. हवाबही
७. हाय्क बही	८. दौबहा	९. ज्याबहा बही
१०. उवाबही	११. उकुबहा	१२. गुइतःबही
१३. सुबहा	१४. हःबहा	१५. इखाछें बही
१६. सिबहा		

६६. गुँलाया गुबही स्वःवने

गुँलाया विशेष पर्व दिनस केवल छगू निगू स्वंगू बहीजक स्वःवना पर्याप्त मजू, परन्तु “गुँलाया गुंगू बही स्वःवनेमाः” धका धाइ । गुबही स्वःवनेगु विषयगत

कया छगू लोकोक्ति प्रसिद्ध जुयाच्चंगु दु व छु धा:सा -

“गुजू वस: पुना, गुपाता सिन्ह तिना, गुछा: नया, गुताबीब:या क्वाति त्वना, गुंगू धर्म पथि स्वया, गुँलापर्व दिन लाका गुता बाजंया स: न्यना, गुंगू भाव लुमंका गुबही स्व:वने” धइगु थ्व नेवा: बौद्ध संस्कृतिया थ:गु हे विशेषता दयाच्चंगु महत्वपूर्ण व प्रसिद्धगु उखान ख: । थुजा:गु गौरवमय उखान बखान अन्तर्राष्ट्रिय बौद्ध जगतय् गनं नं दइमखु । थुकीया रहस्य छु ख: ? धइगु अनुसन्धान कार्य बांकी हे तिनी ।
भीसं न्यनातयागु अनुसार गुंगू बहीया नां थथे ख:-

१. गुइत: बही	पद्मच्चश्री महाबिहार
२. ई बही	सुजातप्रभ महाबिहार
३. क्वन्ति बही	ललितवन महाबिहार
४. धपगा: बही	मणिमण्डप महाबिहार
५. उबहा बही	जशश्री महाबिहार
६. चिकं बही	सप्तपुर महाबिहार
७. इखाछें बही	गोपिचन्द्र महाबिहार
८. न:बही	लोककीर्ति महाबिहार
९. न्हागल बही	सुरश्चन्द्र महाबिहार

नापं इबा: बही, राजश्री महाबिहार व ज्याबहा बही, जेष्ठवर्ण महाबिहार य् नं स्व: वनेगु या: ।

६७. अमोघपाश लोकेश्वर दर्शन

गुँलां बहीद्य: स्व:वनेबलय् प्रदर्शित बहीद्य:या भोलय् भीसं न्हापालाक दर्शन याये मा:म्ह प्रमुख देवता ख: “श्री अमोघपाश लोकेश्वर” । थ्वहे लोकेश्वर प्रदर्शित मूर्तित मध्ये कलात्मक एवं भव्य मूर्तिया रूपय् खनाच्चनी । थ्वया हे ज:ख: आर्यतारा व भृकुटीतारा निम्ह अनिवार्य रूपं ब्वयातइसु जुल । खास याना बहीद्य: स्व:वनेबलय् “अमोघपाश लोकेश्वर अनिवार्य रूपं दर्शब बायेमा:” धका धाइ ।

उकीं हे जुइ बही पतिकं थूगु मूर्तियात विशेष स्थान प्रदान याना तयात:गु खनेदु । थुकीया छगू विशेष कारण दु व छु धा:सा छन्हू अवश्य भीपिं देहान्त जुया वनीबलय् गुलिनं थ:म्हं याना तयागु कुशल अकुशल धर्मपाप गुलि गथे दु धका यमलोकय् जन्मराज चित्रगुप्तं कर्मविपाक फलया बहीखातास कर्मलेखा छु गुलि गथे

दु धका स्वइबलय् उथाय् सर्वप्रथम भीके ध्व खँ न्यनी कि- “छिमिसं बही बिहार य् वना श्री अमोघपाश लोकेश्वर दर्शन याना वयागु दु ला ?” धका प्रश्न याइगु जुयाच्चन । थुगु प्रश्नपाखें मुक्त जुइया लागि बही बिहारय् अमोघपाश लोकेश्वर या मूर्ति अनिवार्य रूपं प्रतिष्ठा याना तयातःगु खः धका परम्परा अनुश्रुति दयांच्वंगु जुल ।

६८. गुँलाया लसता

गुँला थें जाःगु प्रसिद्धगु धर्म लाभ महिना गुँला धर्मया लसताय् छुं छगू धर्मकीर्ति बिहारावश्यकीय वस्तु द्वहलपीगु याइ, गथे शिलांकूश, पिन्पाँ, किकीपा, दिवा, पूजाभः इलां, छत्र, ध्वज चामर, उखेर, मटुक, पेंथिकुन्हः, कर्णपताः, हयेगा आदि द्वहलपिगु याइ । गुलिसियां नामसंगीति खलः, तुतः खलः, भजन खलः, धारणी खलः, व पाठ याइपिं एवं छत्रकू आदि गुरू बज्राचार्य तथा गरीब कुरूवा, अनाथ बालबृद्ध व ल्वगिजनपिन्त थःमहं फुथें नकेत्वंके याना सेवा प्रस्तुत यानाच्चनी ।

६९. गुँलाया भाकल

गुँला धर्म थें जाःगु प्रसिद्ध महीनास थःगु भाकल अनुसारं धर्मगोष्ठी पासापिं मुंका गुलिसिनं नवखण्ड, लक्षावति, पंचरक्षा आदि पाठ याकी । गुलिसियां सहस्रावर्त पूजा, तारा धर्म याकी । गुलिसियां धारणी ब्वंकी । गुलिसियां भजन याकी गुलिसियां स्येल्हों ज्या याकी । गुलिसियां थः पुर्खापिनिगु सालिक स्थापना आदि धर्मकार्य जुयाच्चनी ।

७०. ब्याँजा नके

अतीतकालय् जुयावंगु छगू उल्लेखनीय घटनायात लुमंका गुन्हुपुन्हीकुन्हु ब्याँयात जा नकेगु धका थाय्थासय् ब्याँजाब्व तये यंकेगु चलन दु । छम्ह साधारणम्ह पशु जूसां वयागु विशेष गुणयात लुमंका हार्दिक कृतज्ञता रूपय् ब्याँजाब्व तयेगु यानावयाच्वंगु खः ।

७१. ईताः मत बिये

मतयाः वनीबलय् श्रद्धालु भक्तजनपिसं “ईताः मत च्याका मतयाः वनेगु उत्तम” धका भालपा ईताः मत बियावनी । गुलिं गुलिसिनं न्यातजि ऊनया पंचसूत्रकाया ईताः मत बिया मतयाः वने धुंकल कि उम्ह भक्त हानं ईताः मत बिया मतयाः वने मजिल धका लिपालिपा गुबलें ईताः मत बिया मतयाः वनी मखुत । थुकी थःगु हे रहस्य सुलाच्वंगु दु ।

७२. सच्छि च्याप्वाः मत बियावने

ध्व हे मतयाःया भोलय् गुलिं गुलिं श्रद्धालु भक्तजनपिसं सच्छि व च्यागू धर्मा लोकमुख परिवर्तया संस्मरणकथं सच्छि च्याप्वाः घ्यःदेवा छाया मतयाः वनेगु नं चलन दु ।

७३. ल्हा पिन्पाँ थने

गुंलाया उपलक्ष्यय् थःथःगु बिहारया प्रमुख देवता क्वापाःजु एवं गन्धूरी देवतापिनिगु ल्हातिइ च्वंगु पिण्डपात्रय् पिन्पाँ थनेगु याइ । गुलिसिनं श्री स्वयम्भू भगवानया ल्हा पिन्पाँ थनीपिं भक्तजनपिं नं उतिकं दया हे च्वनी । प्रसंगवश स्वयम्भूया कर्मराज बिहारया गुम्बास बिज्याका- तःम्ह शाक्यमुनि बुद्धया ल्हातिइ च्वंगु पिण्डपात्र थनीगु नं याइपिं मदूगुमखु । थुगु पिण्डपात्र नेपाल अधिराज्यया दकले सकले तःग्वःगु जुइफु । थूगु पिण्डपात्रय् छमुरी वा फ्रिफा जाकि न्त्यः धाइ ।

७४. स्वयम्भूया पिन्पाँ जात्रा

गुबले सम्यक् नराँ पंजराँ जुइ , उगु उपलक्ष्यय् स्वयम्भूया प्रतिनिधि कथं पिण्डपात्र खतय् तया जात्रा याइ ।

७५. अमिताभ जात्रा

बौद्धपुरी बदेगामय् जुगःया दिनस खतय् तया अमिताभ बुद्धया जात्रा जुइ ।

७६. बज्रयोगिनी जात्रा

जुगःया दिनस फम्पिया श्री बज्रयोगिनीया यात्रा जुइ ।

७७. न्याम्ह दीपंकर जात्रा

ख्वपया प्रसिद्ध अजाजुदेव “ श्री दीपंकर बुद्ध” समेघः न्याम्हं भो लाक च्वना जुगःया दिनस चंक्रमणया रुपय् जात्रा जुइ ।

७८. विमान स्वये

ईबाःबहीया सलंसालय् रुपय् दयाच्वंगु कलात्मक काष्ठमय् विमान स्वःवने ।

७९. षटांजु स्वये

ई बहीया संस्थापक बौद्ध विद्वान माध्यमिक दर्शनया आचार्य शुन्य श्री मिश्र

षटांजुया भव्य मूर्ति दर्शन व स्पर्शन याःवनेगु चलन दु ।

८०. तःग्व जाकि स्वये

इखाछैया दुन्तु बही पित्तु बहीस ब्वया तःगु सत्य जुगया जाकि “तःग्व जाकि चिग्वः जाकि” स्वःवने ।

८१. तेड्माखाः स्वये

नदीसंगम बिहार खुसि बहीलिइ ब्वयातःगु अद्भुत आकारगु “ तेड्माः खापाः” स्वःवने ।

८२. सिंहसार्थबाहु तुलांपौ

विक्रमशील महाबिहार थंबहीलिइ सिंहकल्मष नगरया संस्थापक सिंहसार्थबाहुया जीवनी च्वया तयातःगु तुलांपौ स्वःवने ।

८३. केशचन्द्रया तुलांपौ

पारावर्त महाबिहार इतुं बहाया संस्थापक केशचन्द्रजुया चित्रमय जीवनी उल्लेख याना तःगु तुलांपौ स्वःवने ।

८४. शृङ्गकेतुया तुलांपौ

बज्रकीर्ति महाबिहार ओमबहालय् ब्वयातःगु शृङ्गकेतु राजाया जीवनी कथा उल्लेख जुयाच्वंगु तुलांपौ स्वःवने ।

८५. स्वनिगःया तुलांपौ

हिरण्यवर्ण महाबिहार क्वाबहाया वत्तातलेया भोलय् ब्वया तयातःगु स्वनिगःया ऐतिहासिक स्थल अंकित यानातःगु कलात्मक चित्र तुलांपौ स्वःवने ।

८६. षटांजुया महाचीन यात्रा तुलांपौ

यम्पि महाबिहार ई बहीया संस्थापक शुन्यश्री मिश्र षटांजु बुद्ध धर्म अध्ययनार्थ सुदुर उत्तरापन्थ महाचीन व पोतला ल्हासा बिज्याना लिहाँ वःगु घटनाक्रम च्वयातःगु चित्रात्मक तुलांपौ स्वःवने ।

८७. जुजु सर्वानन्दया तुलांपौ

दिपावति नगर गुईतलय् जुयावंगु अतीत घटनायात लुमंका जुजु सर्वानन्द दीपकर तथागतयात बिज्याका सम्यक् पंजराँ न्यायेकूगु सविस्तार वर्णन अंकित यानातःगु चित्रमय तुलांपौ स्वःवने ।

८८. स्वनिगः ओलाया तुलापौ

रत्नाकर महाबिहार, हःबहाया समृद्धवन्त श्रद्धालु दानपति बेखाराज बज्राचार्यजुया स्वनिगःया सम्पूर्ण चैत्य चाःहुला चैत्य प्रतिष्ठा याना ओला न्यायेकूगु सविस्तर वर्णन सहितगु तुलापौ स्वःवने ।

८९. बुद्ध जीवनी क्वताःपौ

लोकाकीर्ति महाबिहार नःबहीया प्रवेशद्वारया फुसेच्वंगु वरन्दाया क्वताःपौतिइ अकित याना तयातःगु कलात्मक काष्ठमय बुद्ध जीवनी कियातःगु क्वताःपौ स्वःवने ।

९०. कर्मविपाक तुलापौ

यम्पि महाबिहार, ई बहीलिइ ब्वयातःगु चित्रमय कर्मविपाक फल निर्देशन याना क्यनातःगु तुलापौ स्वःवने । थुकी बही बिहारय् यायेमज्यूगु अकर्तब्य निषेधकर्म यानागुया प्रतिफल कर्मभोग याइगु, सास्ति याना दुःख कष्ट बिया तःगु कर्मभोग फल क्यनातःगु दु ।

९१. नेपाःया जुजु म्हसिके पौभा

हयेन्दु बहालय् ब्वया तइगु नेपाःया ईलय् ब्यलय् जुयावपिं राजा महाराजापिनिगु चित्र अकित याना तयातःगु पौभा खः । थुकी दुने थये अकित जुयाच्वंगु खनेदु-

“मंजुश्रीकृत रम्यभूमि” नेपाःनिर्माण जुसेलि थूगु देश संरक्षण वा सुब्यवस्थितया नितिं मंजुश्री गुरुं न्हापालाक स्थापना याःम्ह जुजु धर्माकरलिसैं आरम्भ याना गोपालवंशी, महिषपालवंशी, किराँति एवं लिच्छवी, थकू जुजु व मल्ल जुजु एवं शाहकालया श्री ५ राजेन्द्र विक्रम शाह तकया जुजुपिनिगुचित्र अकित याना तया तःगु दु” । थूगु पौभा स्वः वने ।

९२. अबुया ख्वाःस्वये

नेवाः बौद्ध दृष्टिकथं अबुया ख्वाः स्वयेगुया थःगु हे अर्थ दु, थःगु हे महत्व दु । गथे श्री स्वयम्भू धर्मधातु बागीश्वरयात आर्यनामसंगीति सूत्रय् धयातःगु दु “जनकः सर्वबुद्धानां अर्थात् सकल बुद्धपिनि अबु खः” धका प्रशंसा याना तयातल । अथेहे थःत जन्म ब्यूम्ह अपार गुण दुम्ह अबुयागु कृतज्ञता गुण लुमंका आदर सत्कार याना ख्वाः स्वयेगु यानावयाच्वन । अथे हे थम्ह अबु दिवंगत जुल धाःसा वसपोलया पुण्यस्मृति

कथं पुण्यतीर्थं गोकर्णाय वना स्नानं यात्रा श्राद्धकर्म दानधर्म यात्रा निसला बियावयाच्चन । ध्वहे आदर्शं लुमंका गोकर्ण औसीया दिनस श्री स्वयम्भूया अग्रे निसला ब्वयेगु छगू परम्परा हनीगु प्रथा विद्यमान जुयाच्चंगुदनी । थूगु थिति नं गुँला धर्मया अन्तिम दिनकुन्हु जुइगु खः ।

९३. गुँलाया नुप्यने

गुँला लच्छिया सम्पूर्ण सेवा धर्म सिधःगु ल्याखं गुँलाया अन्तिम दिन गुँला पारू धुंकीकुन्हु उपासना आराधना यात्रा अवसं च्वना मद्यमांस, आमिष वस्तु सेवन मयासे च्वनाच्वं पिं भक्तजनपिन्त “थःगु साविक किसिमं आहार/बिहार याये जुल, स्वतन्त्र जुल” धइगु किसिमं नुप्येगु यात्रावयाच्चंगु जुल । थुकिया लसताय् शान्तिपुर स वना शान्तिपुर गुफाया छ्चालं च्वना लगःधगःथापिं स्वना मोहनी सिन्ह फया पूजा यात्रा विसर्जन जुइगु जुल ।

९४. गुँला पारू धुंके

थनं च्वय् वर्णन जूगु अनुसारं गुलि नं भीसं गुँला लच्छिया दुने गुँला धर्म पूर्वकेया निन्तिं भाव भक्तिपूर्वक अनेक विधिकथं पुण्यकार्यस सहभागी जुया अनेक प्रकारं कुशलमूल संग्रह यात्रागु खः उगु पुण्यानुभावं “दुःखी पापी सुं मदयमा, सर्वत्र सर्वदाकालं स्वस्ति प्राणी सम्बोधि ज्ञान लाभ यात्रा काये फुपिं जुइमा” धइगु कामना यासे गुँला धर्म समाप्तिकथं विशेष प्रकारं भावभक्ति यात्रा हर्षोल्लासपूर्वक लसता भोय् नया गुँला धर्म सुसम्पन्न याःगु जुल ।

ख्वपदे (भक्तपुर)

यें देशं करिव ३ को पूर्वपाखे दयाच्वंगु स्वनिगः मध्ये ख्वप देशस नं गुँला पारुनिसें यँलाध्व पारूकुन्हु तक लच्छियंकं विभिन्न नखःचखः कःघाना हनावयाच्वंगु दु । थये हे नागपंचमिं नाग तिका पूजा यायेगु , कृष्णाष्टमिकुन्हु कृष्णद्यःव्वया भजन याना पूजायायेगु आदि याना वयाच्वंसां ध्व गुँला धर्म प्रारम्भ जुइकुन्हु अर्थात् गुँलाध्व पारूकुन्हुनिसें नसंचा उलेव ख्वपदेया धर्मश्रद्धालुपिं थःगु संस्कृतिया बाजा(धाः) थाना बहा बही देवदेवीपिनिगु देगः चाःहुला थःगु श्रद्धाभाव सेवा याना पूजाभाव याइ ।

गुँपुन्हिकुन्हु नं बौद्ध श्रद्धालु भक्तजनपिं श्री स्वयम्भू महाचैत्ययात दर्शन पूजन याना थःगु देया बौद्ध बिहार बहा बही चाःहुला थःगु नित्याचार सिधयेका थुकुन्हु छुचुमहि क्वाति दायेका त्वना उकुन्हुया नखः हनी । यंलाध्वया परेवाकुन्हु गुँला बाजं खलपिनी हर्ष उल्लास साथ पारूभोय् न्यायेकी थुकुन्हुया ज्या पंचदान क्वचायेकी ।

ध्व पंचदानया दिनय् ख्वपय् पंचदानया ज्याभो थुकथं यानाच्वनी । छन्हू न्ह्यःहे दीपंकर गुथिया संघ संयोजक व छःभरियात (गुथिया शाक्यपिं) मुना साबिकया थासं दीपंकर बुद्ध क्वहाँ बिज्याकी । ख्वप दे न्यंकया श्रद्धालु दानपति कृषक उपासकया छेंय् छेंय् पतिकं सुचिनियम याना बँथिला छेंय् छखां बँथिला मोल्हुया शुद्ध याइ । सन्ध्याकाःई जुइवं दीपंकर बुद्धयात निमन्त्रणा यायां दिपावली याइ (मत च्याकी), तुतः व्वनी, गुँला बाजं थाना भो भो मुना बौद्ध भक्तजन समुदायं मत बी धका वयाच्वंगु दइ । दीपंकरया पालाः गुथिया जः मुना ध्वया तिसाया धलःपौ लगत स्वया ठीक जू मजू जाँच याइ । मत ब्यूवनीगु दीपंकरया थाय् क्वय् कथं

१. मूल दीपंकर भ. न. पा. ४ देवननी क्वाथंदों
२. भौरबही दीपंकर भ. न. पा. ६, ७ गोलमदी
३. साक्वथा दीपंकर भ. न. पा. ८ थःधि छेंय् चर्तुवर्ण बिहार
४. थथुबही दीपंकर भ. न. पा. १५ इता छें
५. क्वथुबही दीपंकर भ. न. पा. १७ भारवा चो

पंचदानकुन्हुया बौद्ध संस्कृति व जनआस्था शुभारम्भं निसें पद्म महाबिहार (त्वःबहा) भ. न. पा. १ सूर्यमढि दबू तौलाछेंयंकं लाछिइ पंचदानया चहलपहलकथं

बौद्ध जन आस्थाया प्रदर्शन जुयाच्चनी । ख्वप लागाया सकल श्रद्धालु दानपतिया गुथिहारं पूजाया सामान दान यायेगु वा, छ्व आदि अनेतनेगु यथाश्रद्धां कीभू ज्वना बिहारया शाक्यमुनि गौतम बुद्ध अमोघपाश लोकेश्वरया पूजा यायेत वयाच्चनी, वनां च्वनी । अन स्थवीर (थाय्पाजु) बज्राचार्य, बुद्धाचार्य व शाक्य सकलें मुना सुथबद्धि दान कयाच्चनी, पंचदान बियाच्चनी । अनलि तौलाछि त्वाःलय् लैलिसे जनपद पतिकं निमन्त्रणा ब्यू ब्यूं छसिकथं दीपंकर बाजं खलः, छः भरियात लैलिसें न्हयाइ । सकल उपासकया छैय्-छैय् पतिकं फलिचा फलिचाय् नं दीपंकर बिज्याकेत मू जजमानं तुति सिका पूजा अर्घ यांना नापनापं दान प्रदानया ज्याय् ब्वति काकां छगू हे त्वाः त्वःमफिइक, दुवापतिकं न्याम्ह दीपंकर बुद्ध नृत्य प्रदक्षिणा व लोकोत्तर श्रद्धाभावं प्रदर्शन यासे थाय् थासेया पूजा ग्रहण याइ ।

थुकथं हे बहनी थ्यंकं नं पंचदान न्ह्यानाच्चनी । तौमदि दबुस भैलः छःपाखे स्वका दीपंकर बुद्ध प्रदर्शन जुयाच्चंथाय् तुतः ज्ञानमाला भजन यांना गुँला बाजं थाना आरति (मत बिया) दिपावली संध्या याइ । थ्व इलय् ख्वप देया यक्व जनसमुदायं दीपंकर दर्शन यायेत वइ । अले साक्वथाया गुथिया नायःखलःपिं सकलें मुना तुतःब्वना आरति यांना विसर्जन याइ । तुतः ब्वना दीपंकर नापं तुं चाःहिली ।

अनं वया प्यकालँय् (दुवातय्) थंकालि नकीं मय्जुं विसर्जन पूजा यांना मत बिया मूल दीपंकर बुद्ध भौर बहीया दीपंकर बुद्ध पूर्वपाखे स्वका ल्यहाँ बिज्याकेत हानं न्याम्ह दीपंकर बुद्धपिन्त पालंपाः विसर्जन पूजा यांना थःथःगु थासय् बिज्याकेत बाजं थाना लिहइ । थूगु महोत्सव पंचदान ख्वप देया थःगु हे विशेषता धायेमाः ।

थ्व दीपंकर बुद्धपिन्त ख्वपय् अजाजु छः भाःपा वन्दना पूजना व उत्सव जात्रा न्यायेकावयाच्चंगु खेः । निरंकुश राणाकालय् ब्राम्हणतय्गु ब्रम्हजालं यांना थुजाःगु आदर्शमय जात्रायात बांरा जात्रा धका हिस्याये भनं धायेगु यांनाहल । हानं न्याम्ह दीपंकर बुद्धयात महाभारतया पंचपाण्डव धका धायेगु नं यांनाहल । थ्व उगु ताकया शासकतय्सं याःगु बौद्धतय्या निन्तिं तः धंगु हाथ्या खः ।

ख्वपय् गुँलां बहीछः ब्वयातइगु थाय्

१. थथुबही २. क्वथु बही
३. रूम्बहा ४. भौर बही
५. यां बहा ६. विश्व कर्माछें ७. आजुछःबहा

थिमि (मध्यदेश)

थूगु थिमि (मध्यदेश) देशस गुंगू बिहार दया बज्राचार्य शाक्यपिं दया नं बौद्ध धर्मयात अपालं तिवःदया छगू थःगु हे विशषतां भय् बियाच्वंगु ध्व दे खः अथे धका मुक्कं अन बज्राचार्यपिं जक मखु हिन्दू धर्मया अनुयाइपिं नं मदूगुधयागु मखु श्रेष्ठजातित नं यक्व दु । हाकनं कुम्हा (लाछि) जातिया समूह नं यक्व दु । तर लाछि समूह वा बौद्ध धर्माबलम्बी खः । उगु देशया सकल जनतापिं फुक धर्म संस्कृति प्रति अपालं अस्थावानपिं खः ।

गुँलाध्व प्रतिपदा कुन्हुनिसें गुँला धर्मया प्रारम्भ याइ । धाःबाजं (गुँला बाजं) थाना नसंचाउला न्हापां श्री करूणामययात पुजा याना अले गुंगू बिहार पतिक धाःबाजं (गुँलाबाजं) थाना चाःहुला ल्यहाँ बया बिहार बिहारय् नामसंगीति तुतः आदि ब्वनी । ध्वहे अनुरूप आः तक नं न्त्यानावनाच्वंगु दनी ।

सापारूकुन्हु बज्राचार्यपिनि बहीद्यः स्वःवनेगु चलन मदु । बरू लाछि कुम्हात सकलें थःगु साँस्कृतिक बाजा गाजा (दापा खिं, कोचाखिं) आदि बाजा थाना बिहार पूजा (बहापूजा) यानावइ ।

यूगचन्हे(पंचदान)कून्हु थूगु देशस पेम्ह दीपंकर बुद्धपिं दु उपिं बुद्धपिं पाःलापिसं पूजाभाव याना पितहंइ बाजागाजा सहित नं जात्रा याना थासं थासय् पूजा फया धर्मश्रद्धालुपिसं ब्यूगु पंचदान ग्रहन यायावनी । बोदे तकं थुम्ह दीपंकर बिज्याकी । थूगु हे रूपं पंचदान ग्रहण याइ थुकुन्हु न्हिच्छिं हे पंचदान जुयाच्वन । बहनीइ देया बाजागाजा सहित नं लँस्वःवना हयाः पाःलापिनिगु छैय् छैय् चः दुत बिज्याकी ।

यंलाध्व पारूकुन्हु गुँला बाजंखलःपिसं बिहार बिहारपतिकं निस्ला छाया बिहार पूजा याना वइ केवल बज्राचार्यपिनि जक पारूभोय् न्यायकीइ बहनी भजन याना गुँला धर्म थनन्तु व्वचायेकी ।

गुंगुबहाया नां थुकथं खः

१. हेमवर्ण महाबिहार

तःबहा

२. गुणाकृति महाबिहार

दिगुबहा

॥ थिमि व चाःबहीया कथं ॥

३. हेर नीलवर्ण महाबिहार	याचिबहा
४. गुणवाक्य महाबिहार	याकेबहा
५. हेर सुवर्ण महाबिहार	न्धुबहा
६. जेतबन महाबिहार	(दयुबहा)
७. पूर्वस्थित महाबिहार	जिस्वांबहा
८. नवचैत्य महाबिहार	(गुंगवःचिभा)
९. पाति महाबिहार	(पातिबहा)

चारूमति महाबिहार (चाःबही)

येया करिब १ क्वयति पूर्वपाखे अवस्थित अशोक महाराजया म्थ्याय् मयजु चारूमतिया नामं प्रख्यात जुयाच्चंगु चारूमति महाबिहार (चाःबही) गुंलाध्वया पारूकुन्हु नसंचायेव सुवर्णपूर महाबिहारया भिंच्याखा छेंया शाक्यवंशत थूगु चाःबहीया जक मखुसे इतुंबहाया शाक्य व ख्वपया शाक्यत समेत नं समिलित जुया धाः(गुंला बाज) थाना, खिं थाना सुथय् अन इलाकास गुलि देवदेवीपिं दु फुकभनं चाःहुला थःथःगु छेंय् लिहांवन । गुंला बाजं खिं आदि गुंला बाजं खलःया पाःलाया छेंय् तइ । थूगु हे क्रमं न्हिन्हिं थथे हे पूजा याना गुंला बाजं थाना चाःह्युवनेमाः ।

गुंलाध्व पारूकुन्हु सुवर्णपूर महाबिहारय् लक्षचैत्य थायेगु (द्यःथायेगु) ज्या नं प्रारम्भ गुंला बाजं खलःपिं सकलें न्ह्यान्ह्यापिं सुचिनियम याना द्यः थायेमाः ध्व लच्छित्तंक द्यः थायेगु ज्या प्रारम्भ जुइ । सुथय् तुतः ब्वना बहनिइ नामसंगीति ब्वनीगु ज्या जुइध्व लक्ष चैत्य थायेगु करिब १५ दँ न्ह्यः निसें दिनाच्चंगु दु ।

(१) गुंपुन्हिकुन्हु नसंचाउलेगु भोलय् पशुपति गट्येश्वरी व देवदेवीपिं चाःहुला सदांया थें छेंय् लिहावइ । द्यःद्यःपिन्त धौबजि नं छायेगु याना वइ ।

(२) गुंलागाःया पारू(सापारू)कुन्हु न्ह्याबले थें नसंचाबलय् बाजं थाना द्यःद्यःपिं चाहुला क्वचायेकी । थुकुन्हु न्हिनस पाःलाया छेंय् समे नयेगु याइ ।

गुंलागाया दुतियाकुन्हु गुंला बाजं खलःपिं सकलें न्ह्याबलें थें चाःहुला विशेष नं खासोचीन चैत्य (खास्ति) नं चाःहुला ल्याहां वया थःथःगु छेंय् वनी ।

पञ्चदान (युगचःन्हे)कुन्हु चारूमति निर्माणयाःगु “धनन्द चैन्य”स चारूमति सुवर्णपूर बिहारया फुक सर्वसंघपि उगु बिहारस स्थानीय वासिन्दापि व गोल देया धर्मश्रद्धालुगणपि वया थःथःगु गच्छे अनुसारं शाक्य वंशपिन्त पंचदान प्रदान याइ । थुकुन्हु निश्चिं हे पंचदानया कार्यक्रम जुवाचबनी गुँला फुयेगु पारूकुन्हु फुक बहाबही चाःहुला निस्ला छानावइ । अले छैय् थ्यंका सकसियां समय नया बहनी भोय् नयेगु याइ (पारू भोय्) न्यायेकी । गुँला धर्मया लच्छिया दुने यायेमाःगु थुलि याना क्वचायेका छवइ ।

सक्वदे (साँखु)

यै नं करीब ४ क्वय् उत्तरय् लाःगु संक्व देशस गुँला धर्म मानेयायेगु परम्परा थौतक नं न्हयानाच्वंगु दनी क्वय्कथं जुइ ।

गुँलाध्व पारूनिसें यलाध्व पारूतक्क न्ह्यानाच्वनीगु भीगु नखःचखः आदिया भोलय् बौद्धजनपिं जक मखु सक्व देया संपूर्ण समूह कतानाच्वंगु थूगु गुँला धर्म खः ।

गुँला बाजं खलःपिसं गुलाध्व पारू अर्थात् श्रावण शुक्लया परेवाकुन्हु गुँला बाजं पितहयेत चुक ननिस द्यःल्हाना धाःबाजं थाना पिहाँवइ ध्वाकासीइ तँक बाजं थानावनी ।

पद्मगिरी धर्मधातु महाबिहार (गुँबिहार) धका खड्गयोगिनीया न्हयोने पुजाभू संकल्प याना द्यः पुजा याना कीगःतिना सिधयेका बाजं थाना म्हासुख्वाःमाजुयाथाय् नं थाहाँ वना छचाःखेरं गनगन द्यःपिं दु द्यःपिं फुकसितं पूजा याना चाःहिला ल्याहाँ वया ह्याउँख्वा माजु (उग्रतारा) देवीया न्ह्यःने मण्डलय् पूजा याना काम्पोतल स्तोत्र ब्वना वन्देश्री वज्रसत्त्वया स्तोत्र ब्वना कीगःतिना वज्रसत्त्व ब्वना विसर्जन याना गुँला बाजं (धाःथाना) अनं क्वहाँ वया गन गन द्यःपिं दु अन अन पूजा याना सक्वदे चाःहुला थःगुथासय् लिहावनी । थूगु क्रम लच्छियंक हे थूगु हे रूपं न्ह्यानाच्वनी ।

नागपंचमि

थुकुन्हु सक्वबासिपिं सकसियां भोंयाम्ह नाग लुखाखरूइ तिका पंचामृतं नाग

॥ सक्वया कथं ॥

पूजा याना दच्छितक नागया भय मदयेमाः धयागु कामना याइ ।

कृष्णाअष्टमि

थुकुन्हुया दिनय् कृष्णपूजा याःवनेगु धका बाजागाजा सहीतं कृष्ण द्यः
जकमखु देवदेवीपिं व चैत्य आदि नं पूजा यानावनी ।

गुन्हू पुन्ही

सुथय् सदां थें नसंचा उला छैय् थ्यंका थुकुन्हु छुचुंमही गुता बीबःया क्वाति
दायेका त्वनी थ्व परम्परा स्निग्धःलय् नं उथें हे धायेमाः ।

पारूकुन्हु उगु वर्षय् सीपिनीगु नामं साया वनेगु परम्परा ख्वपया नाप
ज्वलागु खनेदु । धिताकिसीत्वाक धयागु शब्द प्रयोग याना साया वइ ख्याल वइ ।
वज्राचार्यपिनि लाय्कूया जिम्मावालांम्ह दूरिया वज्राचार्यपिंसं नं ख्याल छगू हयेमाः
धका करं ब्यंकातःगु खनेदु तर थौंकन्हे प्रथा मदये धुकल । साया हयेगु
परम्परा च्यागू त्वाःया च्यागू हे साया हयेगु चलन दु ।

पञ्चदान यूगचन्हे

थ्व पंचदान थन यें यल ख्वप स्वया भिन्न खनेदु । थुकुन्हु सुथय् गुरूजुपिं
जजमानपिंथाय् सुनां सुनां सःतल इमिंथाय् इमिंथाय् वना पंचदान काःवनी । अनया
श्रेष्ठपिसं नं. पंचदान बीगुयाः । पञ्चांगुथि नं दु । थूगु गुथि गुबिहारय् बिज्यानाच्चंम्ह
बसुन्धरादेवी जात्रा यानाहया, त्वाःया फलिचाय् दिकी । वज्राचार्यपिं नं क्रम भोलाक
च्वना पंचदान ब्यू वक्वसिके काइ, अथे हे उम्ह बसून्धरा द्यःच्यागू त्वालय्
चाःहिली । अनया धर्मश्रद्धालुपिसं ब्यूगु पंचदान फया उकुन्हु न्हिच्छि हे द्यः जात्रा
जुयाच्वनी । च्यागू त्वालय् बहनी क्वचाय् व गुरूजुपिं छैय् छैय् वना भोय् नइ ।

थुकुन्हु बसुन्धरायात छाःगु फुकं व गुथिं कया गुथिहार दुने इनेमाःधयागु
परम्परा दु ।

थुखे गुँला बाजंयात नं सकसिनं केपू छाः वयेगु परम्परा नं दु व छाःवःगु
फुक वा, जाकि छो जक मियाछ्वया थुकिं वःगु आइस्ताया धिवां पारूभोय् न्यायेकेत
खर्च याइ । मगाःगु ल्हापं नं चले याना पारूभोय् न्यायेकी ।

सक्व देशस दगु गुँला बाजं (धाः)

वज्राचार्यपिनीगु छथ्व - १

मानन्धरतय्गु छथ्व - १

॥ गुँला धर्म ॥

ज्यापु तयेगु धिमे, कोचाखिं, दापाबाजा छथ्व - १

थ्व गुँला धर्म यें, यल, ख्वप थिमिइ जक मखु केपू, पांगा नगां आदि थासय् नं बौद्धजनपिं गन गन दु थ्व श्री स्वयम्भू ज्योतिरुप महाचैत्यया जकमखु । थाय् थासय्या प्रसिद्ध देवस्थलय् वनाः स्वफः बिते याना नं ताताःपाक्क चैत्य, अवलोकितेश्वर, देगः गुम्बा चाःहुलाः संसारय् उत्पति जुयाच्चपिं सत्वप्राणिपिन्त भिंजुइमाः धइगु कामना याना थ्व वर्षाऋतुइ अतिवर्षा, भूमि चलःवनीगु खुसीवालं आपालं नोक्सान याइगु यें जाःगु देशय् अनिष्ठ जुइगु आदि मजुइमाः । सकल प्राणिपिन्त हित सुख जुइमाः धइगु कामना याना थूगु गुँला धर्म हनावयाच्चंगु खः ।

अस्तु ।

गुँला बाजं

गुँला बाजं धायेबलय् गुँला लच्छि यंकं सुथ न्हापां स्वयम्भू महाचैत्ययात वन्दना, पूजना याना थानावयाच्चंगु धाःबाजं यात गुँला बाजं धका संज्ञा बियातल । आःथ्व गुँलाबाजं भीगु थ्व नेपाःगालय् थायेगु चलन गुबलेनिसें वल ? गनं वल ? धइगु अन्वयशनया खँ त्यामजिनी सां थ्व बाजं बुद्धकालीन इलय् हे धाःबाजं धका जातीय नां छूगु खनेदु । लिच्छवीकालय् थ्वया नामय् छुं ह्यूपा मवःसां मल्लकालय् वयाः ई व ऋतुनाप स्वाका गुँला बाजं अर्थात गुँलां थाइगु बाजंकथं नां ह्यूगु खनेदु । थूगु नां थौतकं यें चलेजुयाच्चंसां यलय्, ख्वपय्, थिमि, सक्वय् धाबाजं हे धायेगु चलन दु ।

गुँला बाजंया बारय् बौद्ध जातककथं शाक्यमुनी बुद्धया जन्मस्थल लुम्बिनीइ वसन्तऋतुइ हनीगु छगू छगू दै “भाञ्जिका” महोत्सवय् थ्व बाजं थाइगु धयागु खनेदु । कपिलबस्तुया धार्तराष्ट्र धकाः छायाःपाःतःगु दबुलिइ च्वना ऋतुयात ल्वयेक थी थी ताल व संगीतया रुपय् थाइगु जूगुलिं थ्व बाजंया स्वर लहरि शाक्य राजकुमार सिद्धार्थ न्यातजाःगु रम्य न्हयतजाःगु सूर रम्य व गुतःजाःगु “शुभनाया” राज प्रसादय् च्वनाः न्यनेगु याना बिज्याइ धयातःगु दु । थ्व बाजं थाइबलय् छ्यलींगु न्हयगू ताल थथे खः ।

- १) चोताल - पेंगू मात्रा
- २) जति - न्हय्गू मात्रा (३+४)
- ३) प्रताल - न्हय्गू मात्रा (३+४)
- ४) पलेमा - खुगू मात्रा
- ५) अस्तरा- फ़िगू मात्रा (४+६)
- ६) लंताल - च्यागू मात्रा
- ७) ग्वारा ताल - फ़िंप्प्यंगू मात्रा (६+४+४)

ध्व च्वय् न्ह्याथनागु न्हय्गू तालयात सलललं थायेगुयात ग्वारा थायेगु धकाःधाइ । गुँला बाजंया विशेषता “ ज्यानग्वारा ” थायेगुलिइ दु । थये यइपुसेच्वंगु ताल व संगीत भय्ब्यूगु जुयाः लिच्छबी काल , मल्लकालं पुलावना वर्तमान ध्व पुलांगु अस्तित्व ल्यंकाःतयेफूगु खः ।

शाक्यमुनी बुद्धया महापरिनिर्वाण जुइन्ह्यः कौशलया जुजुं शाक्य गणराज्य हयेकया बिरुधकं शाक्यपिनीगु आत्महत्या व विनास यासेंलि अनया शाक्य व कोलितपिं यें वयाः बसोबास यायेगुया नापनापं थःपिनीगु गौरवशाली धर्म संस्कृति कला संगीतं थन घिसिलाक्क थाय काल । थन नं बौद्ध बहाःबही दयेकल थःगु धर्म संस्कृति व रितिथितिकथं जीवन हनाच्वन । थुकिया दसिया स्वरुप्य् कनक चैत्य महाबिहार (जन बहा)यात नं स्वयेफू । थुकिया लिच्चःखःथौतक नं ध्व बाजंया अस्तित्व व सालीनता ल्यनाच्वंगु दु ।

ध्व गुँला बाजं गुबलय् गबलय् थाइ ?

१. गुँलाध्व प्रतिपदानिसें येंलाध्व प्रतिपदा तक्क लच्छियंकं स्वयम्भू महाचैत्य दर्शन पूजन यायेत नसंचा उली ।
२. सम्येक महादान न्यायेकी बलय् दिपंकर बुद्धपिं बिज्याकेत गुँला बाजं थाइ ।
३. पंचदान बलय् ।
४. बहापूजा वने बलय् ।
५. मङ्गलात्सव मानेयायेबलय् ।
६. धार्मिक अनुस्थान यायेबलय् ।
७. उत्सव बलय् ।
८. बही धःस्वःवने बलय् ।

सन्दर्भ ग्रन्थ

- | | |
|--|--------------------|
| १) स्वयम्भूराण | २) ललितविस्तर |
| ३) सर्वानन्द नृप जातक | ३) श्रङ्गभेदि जातक |
| ५) गरुडपुराण | ६) भीगु नखःचखः |
| ७) कपिसावदान | ८) पिण्डपात्रावदान |
| ९) पलेस्वां (गुंला धर्म धर्मदिशना विशेषाङ्क) | |
| १०) विश्वभूमि दैः - ल्याः - स प्रकाशित गुंला बाजं शान्तरत्न शाक्य व
किरण कुमार जोशीजुपिनीगु छपू लेख । | |

चमिया पिदने धुंकरु कृतित

- (१) नेपाल जनजीवन कृयापद्धति
- (२) यें देया बौद्ध पूजाक्रियाया हलंज्वलं
- (३) भीगु संस्कृतिया ब्वघासा
- (४) नेपा:देया बिहारया ता:चा
- (५) धिमति अबदान
- (६) म्ये:पुच:
- (७) बिमलावति अबदान
- (८) कलशार्चन पूजा विधि
- (९) कलशार्चन परिमार्जित निबबगु संस्करण
- (१०) नेवा:संस्कार संस्कृतिया ता:चा
- (११) बलिपूजाया यथार्थता
- (१२) Buddhist Ritual Dance
- (१३) अमोघपाश लोकेश्वरया बुखं
- (१४) मोक्षगां उत्पतिया बाखं
- (१५) चचा-मुना न्हापांगु ब्व:
- (१६) निपू अबदान
- (१७) मङ्गलाष्टव
- (१८) यें देया चैत्यया विवरणात्मक अध्ययन (प्रेसया लुखाय)
- (१९) गुँला धर्म
- (२०) चचा-मुना निशूगु-ब्व: प्रेसया लुखां प्याहाँबयेत तम्से जुयाचबंगु ।